

ONVPHRII PA=  
NVINII VERONENSIS,  
FRATRIS EREMITAE,  
AVGVSTINIANI



DE RITV SEPELIENDI  
MORTVOS APVD VETERES CHRl  
STIANOS, ET EORVNDem COE-  
METERIIS LIBER.



COLONIAE.  
APVD MATERNVM CHOLINVM.  
M. D. LXVIII.

Cum gratia & priuilegio Caf. Maieftatis.



# MONALDO MONALDENSI CERVARIA VI-

RO ILLVSTRI, BASILICÆ VATICANAE CANONICO,

## ONVPHRIVS PANVINIVS

VERONENSIS, FRATER ERMITA

Augustinianus, S. D.



Is qui de me benemereri non cessant, ego vici-  
cissim, vt mea conditio patitur, gratificari  
totis viribus contendo. Mihi verò nihil præ-  
terea relictum est, quo gratitudinis meæ ar-  
gumenta demonstrarem, nisi vt eorum no-  
mina meis quanquam tenuibus, accuratis ta-  
men, & curiosis lucubratiunculis celebrarem.  
Quum verò constituerim, breues hosce  
commentarios de ritu sepeliendi mortuos  
apud antiquos Christianos, & de eorundem  
cœmeterijs, publicare, ad historiae pontificiæ cognitionem non alienos,  
& more iam recepto amico cupiam nuncupare, Tu vnus occurristi, qui  
in huius studijs versatus, generis splendori, qui summus est, animi modera-  
tionem, & incredibilem pietatem adiunxisti. Familiam enim tuam, inter  
prouinciæ Etruriæ primarias fuisse patriæ tuæ Vrbis veteris, monumen-  
ta publica docent, vetusti que Italiæ annales profitentur. Dantes vir claris-  
simus in egregio illo opere, quod comcediam inscripsit, commemorat, quæ  
per sexcentos ferè annos perpetua serie viros principes procreauit: patriæ  
suæ Orbiti principatum quàm diuturnum obtinuit, multos ecclesiæ Dei  
prælatos subministrauit, atque earum familiarum, quæ nunc (hoc fortunæ  
proprium, hæc eius vis est) summum claritatis. & potentiæ locum tenent,  
proceribus incrementa futuræ magnitudinis & gloriæ tribuit. Tu verò  
eandem nobilitatem excipiens, ipsam moribus, assiduo litteratorum studio,  
litteratorum amore, & liberalitate, qua priuatorum fortunam excedis, exco-  
luisti. Quib. rebus dignus à me existimatus es, cuius nomine non hæc bre-  
uia, sed longe maiora commentaria in manus hominum exirent. Hæc tamen  
modò tuo nomine emisi, etsi non dignum fortasse tua virtute munus, vt  
tamen meæ erga te obseruantiae aliquod apertum modò argumen-  
tum extaret, quem excolendæ virtuti natum, Deus Opti-

mus Maximus sospitet. Vale, Roma Kalendas

Octob. Anno M. D. L. XVII.

# ONVPHRII PANVINI VERONENSIS FRATRIS EREMITAE AVGVSTINIANI

De ritu sepeliendi mortuos apud veteres Christianos & eorundem cœmeterijs Liber.

## P R Æ F A T I O.



Pud omnes gentes Romanas, Græcas, Hebræas, Ægyptias, & alias Barbaras nationes, statos, solennesque sepeliendorum mortuorum ritus, & cærimonias fuisse in libris, quos LX. Antiquitatum Romanorum scripsi, diffuse ostendi, singulasque commentarijs, & tabellis æneis, res ipsas exprimentibus, illustravi. Quod si profanos sepulchrorum ritus memoriæ commendavi, sacras veterum Christianorum in eadem re, pulcherrimasque observationes, quas passim annotavi, silentio præterire nefas esse duxi. De quibus iam iustum commentarium feci, quod in epitoma hic redactum, communi studiosorum utilitati publicare constitui. In quo breuissimè, quæ sancti patres nostri antiqui religionis Christianæ propagatores, de sepeliendi ritu scripserint, aperiàm. De religiosis igitur sepulturæ Christianorum cærimonijs disputaturus, ab hominis Christiani ægrotantis actis solennibus incipere opere pretium videtur, deinde aliqua profequar, quæ ad hoc argumentum convenientia esse iudicabo.

## DE CONFESSIONIS, EVCHARISTIÆ, ET EXTREMÆ VNCTIONIS SACRAMENTIS, animæque morituri commendatione.

### Cap. I.



OMINEM Christianum ægrotantem presbyteros Ecclesiæ usque ab apostolorum temporibus visitasse, pro eo orasse, ipsius confitentis peccata audisse, & dimisisse, eucharistiam porrexisse, extremæque vñctionis Sacramento donasse, docent tum S. Iacobus apostolus, tum alij patres Apostolorum temporibus vicini. Ille quidem epistola catholica cap. V. sic poenitentiam, & extremam vñctionem commemorat: Infirmatur quis in Vobis? inducat presbyteros ecclesiæ, & orent super eum, vngentes eum oleo in nomine domini, & oratio fidei saluabit infirmum, & alleuiabit eum Dominus: & si in peccatis sit, remittentur eis, Confessione scilicet peccatorum: quam quum sæpe, tum extremo vitæ facere solitos fuisse, idem B. Iacobus innuit, quum subiicit: Confitemini ergo alterutrum peccata vestra, & orate pro invicem, vt saluemini. Multum enim valet deprecatio iusti assidua. De Confessione passim omni tempore vsurpata Actorum cap. XIX. Multi credentium veniebant confitentes, & annuntiantes peccata sua. Eandem veteres patres Diui Cyprianus, Ambrosius, Augustinus, Gregorius, item Sozomenus, & alij sæpe commemorant. Ludouicus Pius imperator ægrotus quotidie Confessionis suæ munus, sacrificiumque spiritus contribulati, & cordis humiliati, Deo offerebat. Annonius ex Ademaro libro V. cap. XIX. de rebus gestis Francorum. De sacramento Eucharistiæ paulò ante obi-

tum

tum sumpto, extat exemplum apud Eusebium in historia ecclesiastica lib. V. cap. XIII. de Serapione, qui non nisi ea suscepta mori potuit. Verba sunt hæc: Serapio quidam erat apud nos fidelis senex, qui diu quidem inculpate vixerat, in persecutione verò ceciderat. Hic sæpenumero recipi petierat, verum nemo illi attendebat, sacrificauerat enim. In morbo autem constitutus, totum triduum, mutus, & sensuum facultate destitutus mansit. Post vbi quarto die nonnihil conualuisset, nepoti ex filia ad se vocato dixit: Quousq; ò fili detinetis me? Obsecro properate, & me velociter absoluite. Voca ad me aliquem ex presbyteris, quibus dictis, iterum obmutuit. Cucurrit puer ad presbyterum, erat autem nox. Presbyter agrotabat, ideoq; ire cum puero non poterat. Quoniam verò mādauerat morituros, si petant, & maximè si etiam antè suppliciter petierunt, admitti debere, vt spe bona fulti migrent, parum Eucharistiæ puero dedit, iussitq;, vt id infunderet, & in os senis instillaret. Puer redit, adferens Eucharistiam. Cum autem è vicino esset, antequam ingrederetur, rursus Serapion: Venis (inquit) fili? Presbyter quidem venire nō potest, tu verò cōfestim facito, quod ille præcepit, meq; dimitte. Infudit puer, ac simul ori senis instillauit. Qui cum parum gustasset, mox spiritum reddidit. An non perspicue senex hic tantisper detentus fuit, donec absolueretur, & à peccato liberatus, coram multis quæ fecerat confiteri posset: ita Dionysius Alexandrinus epūs apud Eusebiū. Refert Gregorius Nazianzenus in oratione infunere patris, patrem suū sacerdotē ardentissima & diuturna febris exhaustum, ab ancilla aliquando sinaxis tempore deductum manu in conuentum ecclesiasticū, in quo pro more Eucharistiæ, sed paucissimis, & quibus tum per morbum potuit verbis consecratam, alijs & distribuerit, & ex ea participarit ipse quoq;. Reuersus verò ad lectum, ciboque parum ac somno refectum, melius statim habuisse, ac pristinæ tandem sanitati ex integro fuisse restitutum. Tale quiddam & de sorore sua Gorgonia recitat in oratione in funere fororis. Hoc verò de fratre suo Satyro Ambrosius commemorat in oratione in funere eiusdem: Priusquam (inquit) perfectionibus esset initiatus mysterijs, in naufragio cōstitutus, cum ea qua veheretur nauis scopuloso illisa vado, & vrgentibus hinc atque hinc fluctibus solueretur, non mortem metuens, sed ne vacuus mysterij exiret à vita, quos initiatos esse cognouerat, ab his diuinum illud fidelium sacramentum poposcit, non vt curiosos oculos inlereret arcanis, sed vt fidei suæ consequeretur auxilium. Etenim ligari fecit in oratorio, & oratorium inuoluit in collo, atq; ita se deiecit in mare, & seruatus est. Carolus Magnus paulò ante obitum sacratissimam suscepit Eucharistiā, vt tradit in eius vita Eginardus. Ludouici Pij Imperatoris ægrotantis cibus fuit per XL. dies Dominicum corpus: Annonius ex Ademaro libro V. cap. XIX. de rebus gestis Francorum. Haymo in III. cap. I. ad Thessalonicensis. Qui signo crucis sunt muniti, atque sacramento corporis & sanguinis eius, in die mortis, illi venient cum Christo in gloria ad iudicium. Idiota cap. XX. de sancta Maria virgine, petit à Deo, vt sibi concedat in hora mortis deuotam eucharistiæ suspensionem, quæ quia nos pro via ad aliā vitam euntes confirmat, viaticū appellatur. Extremæ vnctionis regulas Innocentius papa epist. i. ad Decentium Eugubinum episcopum cap. VII. tradit sic: Sanè quoniam de hoc sicut de cæteris consulere nos voluit dilectio tua, adiecit etiam filius meus Cælestinus diaconus in epistola sua, esse à tua dilectione positu illud, quod in beati apostoli Iacobi epistola cōscriptum est: Infirmus quis in vobis inducat presbyteros ecclesiæ, & orent super eum, vngentes eum oleo in nomine domini, & oratio fidei saluabit infirmum, & suscitabit illum Dominus, & si in peccatis fuerit, remittentur ei. Quod non est dubium de fidelibus ægrotantibus accipi vel intelligi debere; qui sancto oleo christiatis perungi possunt, quò ab episcopo confecto, non solum sacerdotibus, sed



omnibus uti Christianis licet in sua aut suorum necessitate inungendo. Cæterum illud superfluum videmus adiectum, ut de episcopo ambigatur, quod presbyteris licere non dubium est. Nam idcirco de presbyteris dictum est, quia episcopi occupationibus alijs impediti, ad omnes languidos ire non possunt. Cæterum si episcopus, aut potest, aut dignum ducit aliquem à se visitandum & benedicere, & tangere chrismate sine cunctatione potest, cuius est ipsum Christma consecrare. Nam poenitentibus istud infundi non potest, quia genus est sacramenti. Nam quibus reliqua sacramenta negantur, quomodo vnum genus putatur posse concedi? Gregorius Turonensis episcopus historiarum lib. VI. cap. VII. auctor est, Hospitium oleo benedicto usum esse in sanationibus infirmorum miraculosis. Hospitius (inquit) apprehensa manu cæsarie cuiusdam ægroti, attraxit caput illius in fenestram, assumptoque oleo benedictione sanctificato tenens manu sinistra linguam eius, ori verticique capitis infudit, dicens: In nomine Domini mei Iesu Christi aperiuntur aures tuæ, referetque os tuum virtus illa, quæ quondam ab homine furdo & muto noxium deiecit dæmonium. Et hæc dicens interrogat nomen. Ille verò clara voce ait, Sic dicor. Cùm hæc vidisset diaconus, ait: Gratias tibi immensas refero Christe, qui talia per filium tuum dignaris ostendere. Synodus Cabilonensis cap. XLVIII. Secundum beati Iacobi apostoli documentum. Cui etiam decreta patrum consonant, infirmi oleo quod ab episcopis benedicitur, à presbyteris vngi debent. Sic enim ait: Infirmatur quis in vobis? inducat presbyteros ecclesiæ, & orent super eum, vngentes eum oleo in nomine Domini, & oratio fidei saluabit infirmum, & alleuiabit eum Dominus, & si in peccatis sit, dimittentur ei. Nō est itaque parui pendenda huiusmodi medicina, quæ animæ corporisque medetur lægioribus. Et Beda lib. II. cap. VI. in Marcum, ægrotos oleo consecrato inungi solitos indicat. Carolus Magnus constituit, ut presbyter in ampulla oleum ferat ad inungendum infirmos, lib. I. cap. CLVI. de legibus Francorum. Haymo super euangelia de ægrotantium vñctione per oleum à Pontifice benedictum affirmat, quod ab Apostolis sit ea consuetudo ecclesiæ tradita, quæ vique ad nostra tempora continuata, nouissimè in Concilio Tridentino vnum ex septem ecclesiæ sacramentis esse contra hæreticorum sententiam, confirmatum est. D. Gregorius homilia Euangeliorum XXXV. auctor est, morem suo tempore fuisse, ut homines ad morientes, quos sanctè vixisse existimarent, in agone positos concurrerint, eisque animas suas commendauerint: Stephanum (inquit) patrem monasterij Reatinæ Urbis virum sanctum, quum dies mortis egredi de corpore vrgeret, conuenerunt multi, ut tam sanctæ animæ de hoc mundo recedenti suas animas commendarent. Idem refert homilia XXXVII. solitos esse orare pro ijs, qui animam iam cogerent. Monachus quidam cùm extremum diem ageret, conuenerunt fratres, ut egressum illius orando protegerent. Qui tanto pro eo coeperunt enixius orare, quanto eum iam videbāt sub celeritate discedere. Episcopi etiam & presbyteri solebant ægrotantes visitare, ut passim ex antiquis historijs constat, Tradit Metaphrastes: Ioannem Eleemosynarium episcopum Alexandrinum magna cura ad ægrotos accessisse, ac sæpe oculos morientium suis manibus clausisse. Quid verò præterea apud ægrotos sacerdotes egerint, ex iisdem monumētis intelligitur. De Adunato in gestis Metensium episcoporum scribitur, quod astantes circa lectum eius euangelia legerint, & Psalmos, hymnosque cecinerint. Apud Audomarū verò preces fecerunt ad Deum, quibus animam ægrotantis Deo commendarunt. Vincentius lib. XXIII. cap. CVIII. Sic quoque confessiones interdum flagitarunt ab ægrotis, illisque Eucharistiæ sacramentū exhibuerunt, ut idem Vincentius lib. XXIII. cap. XCV. tradit de Philiberto. Et in gestis Metensium extat formula confessionis, quam Amatus ante agonem recitasse dicitur, his verbis: Amatus antequā ani-

animam exhalaret iussit, sibi prælegi epistolā papæ Leonis ad Flavianum, in qua fides catholica cōtinetur. Et prælecta dixit: Sic credo. Trinitas ineffabilis: sic confiteor. Deus omnipotens: ita dete sentio, Fili Dei Iesu Christe, qui pro nostra salute dignatus es venire in hunc mundum, sic de te intelligo: Deus æterne spiritus sancte, vnum Deum in trinitate, trinumq; in vnitate cōfiteor. Ita edoctus de tua sentio incarnatione pijsime Christe, quod assumpta carne sint duæ naturæ vnitæ in vnâ personam. Ludouicus Pius imperator moriens, Diogenē episcopū Metensem accersiu, & ab eo benedictionē petijt. Annonius cap. xix. lib. V. Moriētes testamentum cōdere solebant, & aliquot ex suis facultatibus ecclesiæ relinquere, quod testatur S. Gregorius epistola VI. libri VIII. vbi ait: Quendam testatorem duas vncias substantiæ suæ ecclesiæ sancti Gregorij legasse, vbi sepeliri voluit.

## DE CORPORE MORTVO. Cap. II.

Veteres Christiani hominē, vt primū mortuus esset, lauabant. Actorū cap. IX. Quū Tabithā Dorcadem mortuam lauassent, eius corpus in cænaculo posuerūt. In historia de pestilentia Alexandrina Dionysius episcopus ad Hieracē scribit de Christianorū funeribus: Sanctorū corpora lupinis manibus ac sinu exceperunt, oculos depreſserunt, ora clauſerunt vnanimis, & pariter affecti stricim complexi sunt, lauerunt, & ad sepulturā ornarunt, Eusebius lib. vij. cap. xxij. Hic vsus mortuorū corpore ante humationē lauandi vsq; ad nostra tempora permansit. In Gallijs eum morem fuisse refert S. Gregorius Turonensis in libro de gloria confessorum cap. CIIII. Item in vitis Patrum cap. CX.

## DE EXPOSITIONE CORPORIS MORTVI. Cap. III.

Adauer lotum & purgatum in Cœnaculis, & domus publica parte exponebant Actorū cap. IX. Tabithę Dorcadis mortuæ corpus lotum in Cœnaculo exposuerunt, Corpus Caroli Magni more solenni lotum & curatū maximo totius populi luctu in ecclesia Aquisgranēsi expositū, & sepultū est. Ex Eginardo Abbas Vrpergēsi. Tertullian⁹ in libro de anima auctor est, mortuos orationē a presbyteris cōponi cōsueuisse. In Cōcilio Antisiodorēsi decretū quoddā extat, ne mortuis Eucharistia, aut osculū daretur, ne velo aut pallijs corpora eorū inuoluerentur, canone XII.

## DE PLANCTV, ET ATRA VESTE. Cap. IIII.

Planctus, lachrymas, & lamentationes super mortuos antiquos Christianos fecisse, testis est Lucas Actorum cap. V. Curauerunt (inquit) Stephanū viri timorati, & fecerunt planctū magnū super eum. Plorantes verō super mortuos spe resurrectionis consolatur beatus Paulus Apostolus ad Thessalonicenses prima epistola cap. IIII. Origenes libro III. cōmentariorū in Iob cōsuetudinē super mortuos lugēdi fuisse refert. Luc⁹ (inquit) mortui sūt septē dieb⁹, & septē noctibus. D. Cyprian⁹ in sermone de mortalitate mentionē facit atri, vel lugubris amictus, vbi fratres defunctos lugeri aut plāgi omnino prohibet sic: Nobis sæpe reuelatū est, fratres nostros nō esse lugēdos accessione Dominica de sæculo liberatos, cū sciamus nō eos amitti, sed præmitti: recedētes præcedere, vt proficiscentes ad siderari eos debere non plangi: neq; accipiendas esse hic atras vestes, quādo illi ibi indumēta alba iam sumperint, occasionem dandam nō esse gētibus, vt nos merito, ac iure reprehēdant, quod quos viuere apud Deum dicimus vt extinctos, & perditos lugeamus, &c. In luctu quosdā peculiāres gestus adhibuerunt. Et aperte dicit diuus Iōānes Chrysostomus eos eructasse brachia, capillos scidisse, laniasse genas, brachia nudasse, & nigris se vestibus amicisse. Quæ omnia repræhendit, aitque: se quidem non prohibere mortuos lugere, sed impudenter lugere, ne lachrymare super defunctum id improbandum, esse homilia LXI. in XI. cap. Ioannis. Item in exhortatione morali sermone III. in 1. ad Philipenses caput.

Et homilia IIII. in cap. II. ad Hebreos reprehendit morē, qui tempore suo inoleuerat, quod aliquas mulieres lugentes conducerēt, minaturq; se eiusmodi homines ecclesia eiecturum. In Gallijs in mortuorum funcribus vestem lugubrem viros & mulieres assumpsisse refert Gregorius Turonensis libro V. hist. cap. XXXIIII. Metaphrastes funera hominum cum multorum lamentatione, eiulatu, & planctu deducta fuisse tradit. Alcuinus in XII. cap. ecclesiastici: Cū homo dissolutus fuerit, tunc reuertetur in terram suam ad sepulchrū exequijs rite celebratis & finitis, plangentium in platea circa sepulchrum turba præcedente.

## DE RITV EFFERENDI MORTVVM.

### Cap. V.



Mortuos ex domo ad sepulturam ad eum vsum antiquitus adscripti iuuenes efferebant. Actorum cap. V. ait Petrus Sapphyræ: Ecce pedes eorum, qui sepelierunt virum tuum Ananiam ad ostium, & efferent te. Confestim cecidit ante pedes eius, & expirauit. Intrantes iuuenes inuenerunt Sapphyram mortuā, & sepelierunt eam ad virum suum. Posterioribus temporibus summi viri sanctorum hominum corpora extulerunt. Eutychianus Papa CCCXLII. martyres manu sua sepeliuit. Gregorius Nazianzenus tradit, Basilij Magni funus in lectulo aliorum sanctorum manu elatum fuisse. Epiphanius libro III. tomo I. hæresi LXXI. auctor est, Georgium Alexandriæ Episcopū certo numero læticias & feretra constituisse, quib; mortuorū corpora effererēt. Inter efferendū lumina, & cerei accēsi & psalmi David modulis lugubribus, & luctu permixti, canebantur, vt in eadem oratione de libitina sancti Basilij Nazianzenus refert. Qui in oratione infamatrice in Iulianū de funere Constantij Imperatoris loquens: Constantius (inquit) communibus omnium elatus est laudibus, ac pompis, ijsq; venerandis, ac nostris, nec non cantibus tota nocte resonantibus, ac luminibus accensis, quibus Christiani transitum honorare pium censemus, panegyrisq; post mortem dicta est, & corporis facta deportatio cum comitatione. Eadem ferē de Imperatoris Constantini pompa funebri Eusebius in eius vita libro IIII. indicauit. Cadauer (inquit) in capsula collocatum, & purpureo tegmine coopertum, Constantinopolim deportatum est, & in basilica sub altissimis gradibus depositum, luminibus super candelabris aureis circum circa accensis, inde deductum in aliud templum, vbi conditum est. Turba frequēs omnis generis hominum sequuta est, ac preces cum fletu pro anima Imperatoris fudit. Diuus Hieronymus in Epitaphio Paulæ matris: Sacerdotes lampades, cereosq; prætulērunt funeri. Et in epistola ad Eustochium de obitu Paulæ: Ex hinc non vlulatus, non planctus, vt inter sæculi homines fieri solet, sed psalmorum linguis diuersis examina concrepabant. Translata est Episcoporum manibus, & ceruicem feretro subiicientibus, cum alij Pontifices lampades cereosq; præferrent, alij chorospallentium ducerent, in media ecclesia speluncæ saluatoris est posita. Tota ad funus eius Palæstinarum Urbium turba conuenit, monachi, virgines, viduæ, pauperes, Hebræo, Græco, Latino, Syroq; sermone psalmi in ordine perfonabant, non solum triduo, donec subter ecclesiam, & iuxta specum domini conderetur, sed per omnem hebdomadam cunctis, qui venerant suum funus & proprias credentibus lachrymas. Et in epistola ad Oceanum de funere Fabiæ Romanæ: Iam fama volat tanti prænuncia luctus, totius Urbis populū ad exequias congregabat, & sonabāt psalmi, & aurata tecta tēplorū reboans in sublime quatiebāt alleluia. Hic iuuenū chor, illic senū. Audio præcedentiū turmas, & cateruatim, in exequijs eius multitudinē cōfluentē, nō plateæ, nō porticus, nō imminētia desuper tecta,



recta, capere poterant prospectantes. Ioannes Chrysoſtomus homilia IIII. in II. caput ad Hebræos: Dic mihi ? quid volunt iſtæ ſplendide lampades, quid hymni ? & paulò infra: Cogita quid pſallas in illo tempore. Reuertere (inquis) anima in requiem tuam, quia Deus bene fecit tibi. Item: Non timebo mala, quia tu mecum es. Et homilia LXI. affirmat, Honorem mortuo non eſſe ſletum, non eiulatum, ſed hymnos, & pſalmos, & optimam vitam. In Gallijs quoque mos fuit, turbas pſallentium cum cereis funera deduxiſſe, ita cadauer Chrotildis Francorum Regina pſallentium multitudine comitante ſepultum eſt Pariſijs, vt ait Gregorius Turonenſis hiſt. libro IIII. cap. I. Qui etiam libro VIII. cap. X. refert, Clodouci corpus à Rege Guntharanno cum clero, populo & cereis ſepulchro mandatum fuiſſe. Beda libro IIII. cap. XXIII. Tintinnabulis, vel campanis populum conuocari ſolitum fuiſſe tradit ad funerum deducionem. Sanctimonialis femina Begu audiuit ſubito in aëre notum campanæ ſonum, quo ad orationes excitari, vel conuocari ſolebant, cùm quis eorum de ſæculo fuiſſet euocatus, &c. Funeri Romani Pontificis preſbyteros, & diaconos ſanctæ Romanæ eccleſiæ intereſſe debere, ſtatuit Benedictus III. Papa. Bibliothecarius.

## DE MODO SEPELIENDI CHRISTIANOS.

## Cap. VI.

**R**eligione Chriſtiana paulatim creſcente, multa ſancti homines pro Chriſtianorum ſepultura coemeteria fabricarunt, quibus certis, ſtatisque honeſtis ritibus, eadem corpora recondere: hominis enim ſepulchrum perpetuo magni fecerunt, cauſas reddunt Origenes & diuus Auguſtinus. Scribit enim ille libro V. contra Celſum: Humana corpora, vt animæ domicilia, & ſanctioris præcipuæ, haud quaquam ſunt reiſcienda, quippe quæ, ex optimarum legum permiſſu cum honoribus, qui haberi his poſſunt, & ſepultura dignantur. Et libro VIII. contra eundem: Rationalem animam honorare didicimus, & huius organa ſepulchro honorifice demandare. Auguſtinus libro I. cap. XIII. de ciuitate Dei: Nec ideo tamen contemnenda, & abiſcienda ſunt corpora defunctorum, maximeque iuſtorum, atque fidelium, quibus tanquam organis, & vaſis ad omnia bona opera ſanctus vſus eſt Spiritus. Si enim paterna veſtis & annulus, ac ſi quid huiusmodi tanto charius eſt poſteris, quanto erga parentes maior affectus, nullo modo ipſa ſpernenda ſunt corpora, quæ vtique multo familiarius, atque coniunctius, quàm quælibet indumenta geſtamus. Hæc enim non ad ornamentum vel adiutorium, quod adhibetur extrinſecus, ſed ad ipſam naturam hominis pertinent, vnde & antiquorum iuſtorum funera officiôſa pietate curata ſunt, & exequiæ celebratæ, & ſepultura prouiſa, ipſique dum viuerent de ſepeliendis, vel etiam transferendis ſuis corporibus filijs mandauerunt. Haſ igitur ob cauſas hominum corpora veteres terræ mandarunt. Et quidem non ſine periculo Chriſtiani ſapius martyrum corpora reuerenter, & religioſe ſepeliebant. Quod Aſterij ciuis Romani diuitis, nobilis, patricij, ſenatoris, & Imperatorum propinqui exemplum teſtatur: qui quum Marinum martyrem Cæſaræ Cappadociæ capite plexum (vt auctor eſt Euſebius libro VII. cap. XVI.) ſepeliſſet, eo factò, & ipſe capite cæſus eſt. Cùm in conſumatione martyris Marini Aſterius (inquit) adeſſet, corpus illius capite truncum humeris ſuis, ſplendidoq; & pretioſo indumento impoſitum detulit, & ſplendidiſſimè, quantum conueniebat ſepulturæ tradidit, & honorè què martyri detulit, continuo ipſe martyr aſſequitur, Origenes libro I. commentariorū in Iob, meminit pretioſi veſtitus, quo mor-

mortui ornati in terram conditi sunt. Quem si quis pro consuetudine mortui amici corpori inuoluendo mittere constituisset, prius conscindabat, ne eo ab improbis subrepto, corpus irreuerenter abijceretur. Eutychianus Papa (auctore Damasco) constituit, vt quicumq; fidelium martyrem sepeliret, id sine dalmatica, et collobio purpurato nullatenus faceret, & manibus suis per diuersa loca CCC. XLII. martyres sepeliuit. Prudentius, quæ in ecclesijs Occidentalibus in vestimentis, & vngendis defunctorum corporibus fieri solita essent, breuissimè explicat in hymno in exequiis defunctorum sic:

*Hinc maxima cura sepulchris  
Impenditur, hinc resolutos  
Honor ultimus accipit artus,  
Et funeris ambitus ornat  
Candore nitentia claro  
Prætere lineamos est;  
Asper suus myrrha Sabæo,  
Corpus medicamine seruat.  
Quid nam sibi saxa cauata?  
Quid pulchra uolunt monumenta?  
Res quod nisi creditur illis  
Non mortua sed data summo.*

Sanctus Gregorius Papa in Cantica: Mortuorum corpora myrrha condita fuisse tradit, ne putrescerent. Annonius corpora defunctorum magna cura vncta, & aromatibus condita fuisse refert libro IIII. cap. XXXIII. Potentiores quidam cum ornamentis & auro sepeliebantur. Sic sepulta fuit Maria vxor Imperatoris Honorij Romæ, sic propinqua quædam vxoris Guntarani regis Francorum in ecclesia Metensi. Turonensis libro VIII. cap. XXI. Inter deponendum in sepulchro defunctum præcationes habitas esse intelligitur ex oratione Nanzianzeni pro Cæsario fratre, quarum exemplum habetur in fine eiusdem orationis. Diuus Augustinus, homines diuites, qui nimis magnos faciebant in funeribus sumptus reprehendit libro I. cap. XII. de ciuitate Dei, curationemq; funeris, sepulturæ conditionem, exequiarum pompam, magis viuorum solatia, quàm subsidia mortuorum esse tradit. Eandem rem etiam D. Ioannes Chrysostomus arguit. Refert diuus Gregorius moris fuisse suo tempore, quod funera Pontificum Romanorum solerent dalmaticis contigi, quas post sepulturam populus concilas reuerentiæ causa seruare solebat. Quem morem ipse improbat. Indignum enim esse scribit, cum multa adsint ab Apostolorum, & martyrum corporibus velamina, à peccatorum corporibus sumi quod aseruaretur. Statuit igitur vt feretrum, quo Romani Pontificis corpus ad sepeliendum ducebatur, nullo tegmine velaretur, libro XII. in Concilio cuiusdam Romani ab se congregati actionibus. Illud etiam moleuisse videtur, vt Episcopi aliquid pro sepultura acciperent, quam rem Massalino Episcopo prohibet Diuus Gregorius, præcipitque, ne pretium pro sepultura accipiat libro VII. ep. IIII. & LV. Quum tamen sponte pro luminaribus in templo aliquid voluerint hæredes dare, vt id licitum sit accipere, statuit.

#### DE SEPULCHRIS ET EPITAPHIIS.

##### Cap. VII.

In cœmeterijs (de quibus infra dicam) erant priuatorum sepulchra marmorea, lateritata, & loculos habentia, in quibus Christiani sepeliebantur. Ex sepulchris verò quædam fuisse hæreditaria, quædam donatiua, ex eo apparet, quod de vtriusque mentio extat. De hæreditarijs D. Hieronymus in epistola ad Marcellam, de donaticijs Nazianzenus in oratione funebri Cæsarij fratris mentionem faciunt.

unt. Sepulchrum, inquit, à nobis Cæsarius donum habet, quod parentibus ac se-  
nectuti in tempore suo fuerat præparatum. Nicephorus libro VIII. cap. XIII. scri-  
bit Helenam Augustam Hierosolymis agrum figuli parari curauisse ad peregrini-  
orum & aduenarum sepulturam. Diuus Hieronymus ad Pammachium de obi-  
tu Paulinæ vxoris: Cæteri (inquit) mariti super tumulos coniugum spargunt  
violâs, rosas, lilia, floresq; purpureos, & dolorem pectoris his officijs consolantur.  
Quod Prudentius in hymno de exequijs mortuorum repetit:

*Nos testâ fouebimus ossa  
Violis, & fronde frequenti  
Tutulumq; & frigida saxa  
Liquido spargemus odore.*

Magna apud antiquos fuit cura & religio sepulchrorum, vt ex Sidonio intelligi-  
tur, qui tradit epistola ad Secundû libro III. se ipsum quû aliquando interuenisset,  
phibuisse quosdam homines profanos à direptione sepulchrorû, sumpto de ipsis  
supplicio, quia inter alia proau sui tumulû violassêt. Magnifica sepulchra veteres  
extruxisse, ex homilia Ioânis Chrysostomi LXXIX. in XVII. caput Ioannes intel-  
ligitur. Cæterûm quum antiquitus tantum extra urbem in Cœmeterijs hominum  
corpora sepelirêtur, pace ecclesiæ data intra Vrbes ad templorum limina, postea  
in ipsis tēplis sepeliri mos inualuit. Constātinus in porticu tēpli apostolorû Con-  
stantinopoli: Honorius in porticu templi sancti Petri Romæ, eius vxor intra idē  
templû sepulti sunt: Rotharis rex Longobardorû Ticini in sancti Ioânis Baptiste,  
Clodoueus Francorum Rex Parisijs in templo Apostolorum, Clotharius Rex  
Parisijs in basilica sancti Vincentij, Brunchildis Regina Francorum apud He-  
duam in æde Sancti Martini, Carolus Martellus, & eius filius Pipinus in templo  
sancti Dionysij Parisijs, Carolus Magnus Imperator in ecclesia sanctæ Mariæ A-  
quisgrani. Hludouicus Pius Imperator in basilica sancti Arnulfi Mesis. Macedo-  
nius Constantinopolitanus Episcopus apud Gangras exul moriens, in templo  
sancti Gallinici martyris, Diuus Benedictus Abbas Casinas in basilica sancti Io-  
annis Baptiste conditi sunt. Eorum enim, qui pietatis laude, aut rerum gestarum  
magnitudine celebriores fuerunt, corpora in templis tumularunt. Sic Leo, Sim-  
plicius, Gelasius, Anastasius II. Symmachus, Hormisda, & reliqui deinceps Ro-  
mani Pontifices ad sanctum Petrum Apostolum sunt tumulati: Ioannes Papa  
Rauennæ, Agapetus Constantinopoli translati, Romæ in eodem templo sepulti  
sunt. Iustinianus Imperator Constantinopoli basilicam sanctorum Apostolorû  
in quo Imperatores, & Patriarchæ locum sepulturæ haberent. Euagrius  
libro III. cap. XXXI. Cæterûm sepulchra marmorea fuisse Gregorius Turonen-  
sis de gloria confessorum cap. XLII. testatur. Sepulchrorum loca sacerdotali be-  
nedictione consecrata fuisse ait idem Gregorius libro eodem cap. CVI. Nobiliû  
sepulchris lychnuhos suspendere solebant, quod libro III. cap. XXX. exponit  
Turonensis, qui scribit Glafuintæ Reginæ Francorum lychnum fune fracto  
dilapsum esse. Ignatius in vita Tarasij ait: Mulieres profluuo sanguinis laboran-  
tes ex lampade ad sepulchrum Tarasij Patriarchæ Constantinopolitani lucen-  
te, hausisse oleum, & sanatas esse. In primo Concilio Bracarensi decretum legitur,  
ne corpora defunctorum intra basilicas sanctorum tumultentur, sed fiant omnes  
sepulturæ extra ciuitatem, cap. XXXVI. Sepulchris Chnslianorum epitaphia af-  
figebantur, de quibus meminit Prudentius in passione sancti Hippolyti Episco-  
pi, & martyris.

*Innumeros cineres sanctorum Romula in Vrbe,*

*Vidimus Christi Valerine sacer*

*Incisos tumulos, titulos, & singula quæuis*

*Nomina difficile est ut replicare queam.*

*Plurima litterulis signata sepulchra loquuntur*

*Martyris, aut nomen, aut epigramma aliquot.*

Extant adhuc multa sanctorum martyrum epitaphia carmine facta, quibus Damasus Papa eorum sepulchra exornauit. Reliquorum etiam hominum sepulchris epitaphia addiderunt, quorum infinita penè ante mille annos videntur per Urbis Romæ ecclesiarum pavimenta. Nam his, qui de republica Christiana benemeriti erant, epitaphia addi solere, & sepulchrum, monumenta, titulosque statuta fuisse à Christianis, ait Paulus diaconus libro III. cap. IX. historię Longobardorum. Post pacem Christianis datam, multos ex imperito vulgo in cœmeterijs luxuriose bibisse, imò etiam ipsis cadaueribus exhibitas epulas. Quas voracitates, & ebrietates perinde ac religiosas habitas, disertè Augustinus reprehendit libro primo de moribus ecclesię cap. XXXIII. & epistola LXIII. ad Aurelium Carthaginensem Episcopum, ubi ita ait: Commestationes & ebrietates ita concessę, & licitę putantur, vt in honorem etiam beatissimorum martyrum, non solum per dies solennes, sed etiam quotidie celebrētur. Arceatur igitur tantum decus de sanctorum corporum sepulchris, de locis sacrorum, de domibus orationum, addiditque eum abusum in Italia & alijs prouincijs aut nunquam fuisse, aut exortum episcoporum diligentia sublatum esse. Et paulò infra: Sed quum istę in cœmeterijs ebrietates, & luxuriosa conuiuia, non solum honores martyrum à carnali & imperita plebe credi solent, sed etiam solatia mortuorum, mihi videtur facilius illic dissuaderi posse istam foeditatem ac turpitudinem, si etiam de scripturis prohibeatur. Longobardos Christianos in locis defunctorum trabes erexisse, vt quisque sciret, quo in loco sui iacerent, auctor est Paulus diaconus, libro V. cap. XIII. de rebus gestis Longobardorum. Sepulturas vendi, & laicos in ecclesijs sepeliri vetat synodus Triburiensis cap. XV. Hinemarus Remensis Episcopus cur non sint vendenda sepulchra addit rationem: quòd sit terra illa concessa putredini, & non deceat de alieno luctu facere compendium, in epistola ad ecclesiam Tornacensem.

## DE ORATIONIBVS FVNEBRIBVS.

### Cap. VIII.



Æterum antequam mortuorum corpora humi mandarent, orationes de eorum vita haberi solitas, ex Eusebio, Nazianzeno, & Socrate clarum est. Eusebius enim Constantinum, Nazianzenus fratres Cæsarium & Basilium, Gregorius Meletium Antiochenum Episcopum (vt ait Socrates libro V. cap. IX.) mortuos orationibus funebribus laudarunt.

## DE ELEEMOSYNIS PRO MORTVIS.

### Cap. IX.

**C**ondito, & curato funere, dabantur eleemosynę. Origenes libro III. in Iob: Conuocantur (inquit) in anniuersarijs diebus memorię, vel parentum defunctorum, seu amicorum, seu quorumcunque, qui in fide discessissent, sacerdotes simul, & laici, atque in eo cœtu primùm mortuis, quòd in fide discessissent, gratulantur, & sibi piùm & tranquillum exitum quisque precatur, postea conferuntur eleemosynę, vel oblationes, quę in pauperes, qui simul tum adsunt, pupillos, & viduas distribuuntur. Hieronymus ad Pammachium de obitu Paulinę vxoris: Pammachius noster sanctam Fauillam, ossaque veneranda Paullinę eleemosynę balsamis rigat, his pigmentis, atque odoribus fouet cineres quiescentes, sciens quia



quia scriptum est: Sicut aqua extinguit ignem, ita elemosyna peccatum. Diuus Augustinus epistola LXIII. ad Aurelium Carthaginensem Episcopum: Si quis in memorijs mortuorum aliquid pecuniæ offerre voluerit, in præsentī pauperibus eroget, ita nec deferere videbuntur memorias suorum, quod potest gignere non leuem cordis dolorem, & id celebrabitur in ecclesia, quod pie & honestè celebratur. Eadem propemodum refert D. Ioannes Chrysostomus in oratione de martiribus.

DE ORATIONIBVS, PRECIBVS, OBLATIONIBVS,  
sacrificijs, & diebus anniuersarijs pro animabus defunctorum.

Cap. X.

**T**ertullianus in libro de corona militis: Oblationes pro defunctis, pro natalitijs annua die facimus. Et in libro de Monogamia: Enimvero pro anima eius oret, & refrigerium interim adpostulet ei, & in prima resurrectione consortium, & offerat annuis diebus dormitionis eius. Hinc anniuersariorum sacrorum pro defunctis cum elemosynis origo, quæ apud nos perpetua instituitur. Quam rem perinde ac nuper institutam hæretici hodie irridunt. Diuus Cyprianus libro primo epistola IX. ad clerum Furnitanorum: Episcopi antecessores nostri religiose & salubriter prouidentes censuerunt, ne quis frater excedens ad tutelam, vel curā, clericū nominaret, ac si quis hoc fecisset, non offerretur pro eo, vel sacrificiū pro dormitione eius celebraretur. Neq; enim apud altare Dei meretur nominari in sacerdotum præce, qui ab altari sacerdotes, & ministros voluit auocare. Et ideo Victor cum contra formam nuper in Concilio à sacerdotibus datam Germinium Faustinum presbyterum ausus sit tutorem constituere, non est, quod pro dormitione eius apud vos fiat oblatio, aut deprecatio aliqua nomine eius in ecclesia frequentetur, vt sacerdotum decretum religiose & necessariè factum seruetur à nobis. Eusebius libro IIII. de vita Constantini: Turba frequens omnis generis hominum funus Imperatoris Constantini secuta est, ac preces cū fletu pro anima Imperatoris fudit. Diuus Augustinus lib. IX. confessionum cap. XI. de sancta Monica matre sua moriente loquens, ait: Illud vos rogo, vt ad Domini altare memineritis mei vbi fueritis. Et cap. XII. In eis precibus, quas tibi sudimus cum offerretur pro ea sacrificium pretij nostri, iam iuxta sepulchrum posito cadauere, nunquam fleui. Precum, & elemosynarum pro defunctorum animabus mentionem faciunt D. Ioannes Chrysostomus homilia LXI. in XI. cap. Ioannis, & sermone III. in primum caput ad Philipenses: Item Diuus Aurelius Augustinus epistola LXIII. ad Aurelium Episcopum Carthaginensem, sic: Oblationes pro spiritibus dormientium, quas vere aliquid adiuuare credendum est, super ipsas memorias non sint sumptuosæ, atque omnibus petentibus sine typho, & cum alacritate præbeantur, neque vendantur. Tradit Metaphrastes, Io. elemosynarium præcepisse, impigre fieri oblationes, & sacrificia pro defunctis. Sic de Tuma presbytero Bedas scribit, quòd in monasterio Tumiaestir pro fratre suo, quem in bello interfectum putarat, sæpius Missas celebrarit, pro absolutione animæ eius: sicq; factum, vt is in bello à nemine vinci posset. Hoc miraculo permoti alij, similiter pro illis, qui de sæculo migrarant, oblationis sacrificia tulerunt, edocti sacrificium missæ ad redemptionem animæ & corporis valere. In historia ecclesiastica libro quarto cap. XXII. Collectas pro defunctis fecerunt, quod eas mortuis ad redemptionem animæ prodesse crediderint, vt docuit Ioannes Elemosynarius, teste Vincentio libro XXII. cap. CX. Hinenarius Remensis Episcopus ait in epistola ad Tornacensem ecclesiam: Ab ami-

cis propinquis, hæredibus mortuorum ecclesijs, in quibus ipsi sepulti erant, offerri aliquid solitum esse, quum accipere quidem, sed non exigere liceat. De diebus verò VII. XXXIII. & XL. solennibus mortuorum pauca dicamus. In ecclesijs Occidentalibus celebris ob defuncti memoriam fuit dies XL. post obitum, Ambrosius in oratione funebri Theodosij Imperatoris: Eius principis, & proximi conclamauius obitum, & nunc quadragesimum celebramus, sicut sanctus Ioseph patri suo Iacob quadraginta diebus humationis officia detulit. Vbi & de eius ritus varietate ista addidit: Alij tertium diem, & XXX. alij VII. & XL. obseruare cõsueuerunt. Idẽ in oratione de fide resurrectionis. Nunc die septima sepulchrũ ad redimus, q̃ dies symbolũ futuræ quietis est, quo in loco refert orationes, & exhortationes eo die haberi consueisse: Narrat Diuus Gregorius in dialogis libro II. cap. XXIII. duas quasdam sanctimoniales petulant laborasse lingua, sanctum Benedictum verò minitantem dixisse: Nisi correxeritis linguas vestras, excommunico vos. Mortuæ verò sunt mulieres, & in templo sepultæ. Cum autem tempore Missæ diaconus clamaret de more, si quis non communicat, det locum: vidit earum nutrix etiam istas sepultas mulieres surgere, atque de templo exire. Postea igitur oblatione pro defunctis facta, remanserunt in sepulchris. Scribit idem Pontifex quandam mulierculam pro suo marito in bello capto, & adducto, veluti pro mortuo, hostias hebdomadibus singulis curasse offerri, in euangelia homilia XXXVII. Recitat idem auctor Cassium Narniensis vrbis Episcopum, prope sancti Iuuenalis martyris sepuechrum quotidie obtulisse sacrificium pro defunctis & viuentibus, in euangelia homilia VII. Orationes, quibus animas mortuorum Deo commendant, commemorat Bedas libro III. cap. XXV. Gesta Episcoporum Metensium recitant de Clodulfo Episcopo, quod ipsi sepulto, clerici eius per dies XXX. Missarum solennibus, orationibus, continuis vigilijs, & psalmodijs pietatis intuitu iusta persoluerunt. Impijs vero, neque loco solito iuxta ceteros Christianos tumulus datus, neque preces pro ijs exhibitæ, neque Missæ dictæ, aut psalmi cantati. Bedas libro V. cap. XV. Memorias defunctorum anniuersarijs orationibus, vigilijs, psalmorum laude, Missis celebrarunt, vt tradit idem Bedas libro tertio cap. II. qui refert ad crucem, quam Ofuualdus in Anglia erexerat, fratres Hagustaldensis ecclesiæ quotãnis pridie ante illum diem, quo is occisus fuerat, vigilias cum plurima psalmorum laude continuasse, & victimam sacræ oblationis pro salute animæ eius offerri solitos fuisse. Oluuius quoq; Rex, in loco, vbi Ofuinum Regem interfici curarat, eo nomine monasterium extruxit, vt quotidie preces pro vtriusque anima ibi fierent, teste Beda libro III. cap. II. Sic de Monialibus idem scribit, quod expletis matutinis horis, quotidie ad fratrum sepulchra certas Deo laudes canere solerent, libro III. cap. VII. Aedifuualdus in epistola ad sanctum Bonifacium refert, memorias mortuorum annuersario die orationibus celebratas. Defunctorum nomina pro vt opportunitas anni exegerit, ex vtraque parte adducta fuisse. Ioannes Damascenus in sermone de defunctis affirmat, non tantum anniuersarias, sed etiam trigestas, & quadragesimas in defunctorum vtilitatem cedere, ex auctoribus, Diuo Gregorio, & Dionysio, & alijs patribus, quam rem Apostolos approbasse tradit. S. Bonifacius in epistola ad Alderium abbatem pro dormientium fratrum animabus orare iubet, Leobgyta in epistola ad sanctum Bonifacium: Pro anima patris mei preces ad Deum offerre non renues. Carolus Magnus libro II. cap. XXXI. pro parentibus suis, & amicis orat, & pro ijs elemosynas distribuit. Michael, & Procopia Imperatores Tarasij memoriam anniuersaria die celebrarunt ad sepulchrum eius. Annales Constantinopolitani lib. XXIII. Ex his igitur sanctorum patrum locis, ignem purgatorium esse satis apertè intelligitur, cuius præter alios vetustissimus auctor

Origenes ita meminit Homilia II. in psalmum XXXVI. Est hoc (inquit) peccatum ira, vnum ex illis, quod ad ædificia adfert ligna, scænum & stipulam. Et necesse est huiusmodi materias per ignem probari, ita vt permancamus tandiu in igne, donec in nobis ligna iracundiæ consumatur, & scænum indignationis, & stipula verborum eorum, quæ huiusmodi vitijs exagitati pertulimus. Et homilia III. in eundem: Veniemus ad illum ignem, in quo vniu'scuiusque opus quale sit ignis probabit, & vt ego arbitror, omnes vos venire necesse est ad illum ignem, etiam si Paulus aliquis sit, vel Petrus: venit tamen ad illum ignem, sed illi tales audiunt, etiam si per ignem transeas flamma non vret te. Homilia octaua in Leuiticum asserit eos, qui peccatum commiserunt, quod neque in hoc, neque in futuro sæculo remittitur per duas septimanas manere immundos, sed tertia incipiente purgari ab immundicia. Homilia duodecima in Ezechielem: Nobis alia (inquit) seruantur tormenta, qui videmur credere, & in ipsa credulitate peccamus, ab eorū supplicio, qui ne initium quidem credulitatis habuerunt. Et libro quinto contra Celsum: Singulos quibus per ignem, vel pœna sit simul, & medicatio adferenda ignis iste amburit, non tamen exurit, vt qui nil habent, quod per ignem sit absumendum. Plura dicit in eam sententiam ante, & post ea verba.

## DE COEMETERIIS.

## Cap. XI.



COEmeteria loca erant Christianorum sepulturæ speciatim assignata. Nam quemadmodum veteres tam antiquæ, quàm nouæ legis patres mortuos dormire dicebant (quod frequenter diuina scripta commemorant, vt illud: Dormiuit cum patribus suis in senectute bona: Et epitola prima ad Thessalonicenses cap. IIII. Nolumus vos ignorare de dormientibus, vt non contristemini) sic eorum sepulchra appellabant eo nomine, quodd significaret loca ad quietem & somnum comparata. Athenæus lib. IIII. ex Dosiadis, item libro IIII. τῶν περὶ τῶν κρητῶν scribit apud Cretenses in singulis ciuitatibus fuisse quasdam ædes publicas, ad excipiendos peregrinos, quæ appellabantur cœmeteria. Sed Christiani hoc verbo pro sepulturæ locis (vt dixi) præcipuè vsi sunt. Veteres primitiuæ ecclesiæ patres sua cœmeteria habuerunt, in quibus Christianorū corpora sepelirent. Ea 1. Corinth. cap. XV. beatus Paulus innuit. Deinde, quia solebant ad sepulchra sanctorum martyrum, quorum sacrosancta erat memoria anniuersario die passionis eorum conuenire ampla, & capacia cœtibus publicis orationum loca cœmeterijs adiacentia, etiam Cœmeteria vocarunt. Legimus veteres Romanos Pontifices inter martyrum tumulos stationes, id est, omnes actus publicos pontificales celebrare consueuisse. Itaque hæc cœmeteria erant Christianis (quod & nunc sunt) veluti templa, & orationum loca, in quibus Episcopi synodos congregabant, sacramenta administrabant, verbum Dei concionabantur. Hinc illud scitu dignum, quod quum Imperator quispiam persecutionem in Christianos instaurare constituisset, ante omnia eos à cœmeterijs arceri solebat, ne in vnum conueniendi eis facultas esset. Itaque legimus apud Eusebium Cæsariensem historiæ ecclesiasticæ libro VII. cap. XI. Aemilianum iuridicum Ægypti in Valeriani persecutione ita Dionysium episcopum, presbyteros, & Clericos Alexandrinos, & alios Christianos in Christi fide constantes alloquentem: Video vos, & ingratos esse, & nō sentire mansuetudinē Augustorum, quapropter Alexandriæ non eritis, sed in Libyam relegabo vos, & vobis alijs que non licebit amplius synodos colligere, vel ad cœmeteria (sicut vocant) ingredi. Et historiæ

eiusdē libro IX. cap. II. legimus Galerium Maximinum aliquando cōnatum cœmeteria Christianis rursus adimere, cū eos dissipare, atque pessundare vellet. Itaque (inquit) nihil nō ad subuersionem nostrā molitus, primū nobis libertatem in Cœmeterijs conueniendi prætēxu quodam adimere conatur. Rursus cū Imperator alius persecutionē in nos reprimere vellet, antē omnia ius conueniendi in cœmeteria reddidit. Extabat Gallieni Augusti edictum, quo Christianis cœmeteria sua restitui iussit, vt ad sua sacra coire possent, quibus à patre suo Valeriano Imperatore paulō antē impijs edictis prohibiti fuerant. Eius rei ita Eusebius libro VI. cap. XIII. meminit: Valeriano Imperatore capto, filius eius Gallienus monarchiam nactus, moderatius imperio utitur, ac confestim publicis edictis persecutionem cōtra nos motam remisit, & vt doctrinā nostrā præsides cuncta liberē pro consuetudine sua obirent, dato rescripto præcepit. Extat eius constitutio, quam ad episcopos misit, permittens illis illa loca recipere, quæ cœmeteria vocamus, & paulō supra: Imperator Cæsar P. Licinius Gallienus Pius Felix Augustus Dionysio Pinna, Demetrio, & alijs Episcopis salutem:

Beneficentiam doni mei per vniuersum mundum publicari mandauī, vt à locis, quibus disciplinæ gratia detinentur, discedant, & ob hanc causam etiam vos exemplo huius rescripti mei vtī potestis, ne quisquam vobis negotium facessat, & hoc quod à vobis licitē perfici potest, diu antea est à me concessum. Quapropter Aurelius Quirinus, qui maximis negocijs præest, exemplar à me datum custodiet. Eusebius igitur indicat præcipuum eius beneficium fuisse, quod permiserit Christianos recuperare cœmeteria. Cum igitur audimus ea Christianis permitti, intelligimus etiam permitti, vt ad sua sacra coire possint. Gallienus sui edicti custodem, & veluti executorem, ac vindicem nominat quendam Aurelium Quirinum. Ex his igitur liquet, apud Christianos persecutionum tempore cœmeteria præcipua quædam templa, siue loca sacra fuisse, in quibus ad sua sacra conuenire possent. In cœmeterijs fabricas materiales fuisse, sacrorum mysteriorum vībus extructas, auctor est Damasus Papa, qui in sancti Fabiani Papæ & martyris vita ita ait: Hic multas fabricas per cœmeteria fieri præcepit. Bibliothecarius in vita Ioannis III. Papæ: Hic ampliavit, & restauravit cœmeteria sanctorum martyrum. In cœmeterio beatum Xystum II. Papam cum quattuor diaconis occisum fuisse, auctor est sanctus Cyprianus libro V. epist. ad Successum. Xystum (inquit) in cœmeterio animaduersum sciatis, & cum eo diacones quattuor. VIIII. Idum Augustarum die. Hinc Damasus ait: Liberium Papam de exilio reuersum, habitasse in cœmeterio sanctæ Hagnetis apud Constantiam, sororem Constantij Augusti. Et paulō infra: Constantius Augustus factō Concilio, misit & reuocauit Liberium de cœmeterio sanctæ Hagnetis. Bibliothecarius ait: Bonifacium Papam Vrbe pulsus habitasse aliquando in Cœmeterio sanctæ Felicitatis martyris, via Salaria. In Cœmeterijs Romæ existentibus, baptismum, & missas celebrare, vigiliis decantare, ordinationes & stationes, id est, omnes sacras cæremonias habere, veteres solitos fuisse, docent antiquissima ecclesiastica monumenta. Protonotarius sanctæ Romanæ ecclesiæ in actis Liberij Papæ, primo tomo Conciliorum: Habebat Liberius Papa ab Vrbe Roma milliario tertio, in cœmeterio Nouellæ, iuxta Cœmeterium Ostrianum, vbi Petrus Apostolus baptizauit. Eodem tempore Paschæ baptizauit Liberius Papa (in eodem cœmeterio) promiscui

sexus



sexus numero quatuor millia & duodecim: quia omnes Romani, & à longè alij, & Romanorum vicini desiderabant ab eodem baptizari. Bibliothecarius in vita Sergij Papæ. Hic tempore sui presbyteratus impigrè per coemeteria diuersa missarum solennia celebrabat. Concilium Eliberinum sub Syluestro Papa celebratum, cap. XXXV. Placuit (inquit) prohiberi, ne foeminae in coemeterio peruigilent, eò quod saepe sub obtentu orationis scelera latenter committant. Item ex Apologia diui Athanasij de fuga sua: In hebdomada post sacram Pentecostem populus completis ieiunijs ad orandum ad coemeterium abiit. Cui loco, conuenire videntur Leonis Papæ verba: Quarta & sexta feria ieiunemus, sabbato verò apud sanctum Petrum consuetas vigilias celebremus. Damasus Papa in vita Dionysij Papæ ait: Ipsum presbyteris Romanis ecclesias, & coemeteria (curanda scilicet) diuississe. Vetusissimum ante Damasum tempora Sanctæ Romanæ ecclesiæ registrum: Populus Romanus timens Deum, multisque persecutionibus fatigatus, per coemeteria martyrum stationes sine clericis celebrabat, & ad sanctam Hagnem multi fidelium conuenerunt. Anastasius Bibliothecarius in vita Ioannis III. Papæ ita scribit. Hic ampliauit, & restaurauit coemeteria sanctorum martyrum, & instituit vt oblationes hamulæ (panem scilicet, et vinum pro sacrificio intelligit, quia hæc verba in hoc significatu passim accepta inueniuntur) & luminaria per eadem coemeteria omnibus Dominicis de Lateranis administrarentur. Et paulò infra: Tunc venerabilis Papa Ioannes retinuit se in Coemeterio sanctorum Tiburtij & Valeriani, & habitauit ibi multo tempore, vt etiam Episcopos ibidem consecraret. Idem in vita Gregorij III. Papæ. Hic institutis disposuit, vt in coemeterijs sanctorum martyrum circumquaque positis Romæ, in die natalitiorum ipsorum luminaria ad vigilias faciendas, & oblationes de patriarchio per oblationarium deportarentur, ad celebrandas missas per sacerdotem qui pro tempore fuerit. Item in vita Nicolai primi: Hic Pontifex coemeterium sancti Marci, inter vias Appiam, & Ardeatinam, multis ruinis conuassatum atque contritum mirifice construxit, ac decorauit, diuini quoque cultus mysterium, quod multis per temporum cursus discesserat, restituit. Quis igitur negare audebit Coemeteria non solum idem cum ecclesijs fuisse, sed aliquid amplius, quàm ecclesiæ Urbanae, sepulchra scilicet Christianorum, quæ intra Urbem fieri non poterant, habuisse, quum in ijs stationes, & synodus haberi, baptismum, ordinationes, & missas celebrari, & vigilias fieri videamus? Igitur contra aliquorum sententiam COEMETERIVM FACIT ECCLESIAM SIVE BASILICAM, quod expresse Damasus Papa in vita sancti Marci Papæ, qui sancto Siluestro immediate successit, exponit sic: Marcus Papa fecit basilicas duas vnâ via Ardeatina, in qua sepultus est, aliam in Vrbe Roma iuxta Palatinas. Ex huius suggestione Constantinus Augustus obtulit basilicæ, quam coemeterium instituit via Ardeatina fundum rosarum: Et paulò infra: Marcus Papa moriens sepultus est in Coemeterio Balbinæ, via Ardeatina, quod ipse insitens fecerat. Hic animaduersione dignum, ecclesiam illam, quam antea basilicam vocauerat, coemeterio ibidem constituto, non amplius basilicam communi scilicet nomine, sed Coemeterium speciali appellatione dici.

DE COEMETERIIS VRBIS ROMÆ.  
Cap. XII.



Iusmodi Coemeteriorum plura, qualia etiā nunc cernuntur Romæ, fuerunt, vel in topho suburbano facellis quibusdam adiunctis excavata, vel in subterraneis cryptis constituta, ex quibus in antiquis ecclesiæ monumentis horum mentionem inuenimus.

I.

Coemeterium omnium vetustissimum Ostrianum, via Salaria ad tertium ab Vrbe lapidem, in quo beatus Petrus Apostolus baptizasse dicitur. De quo Protonotarius sanctæ Romanæ ecclesiæ in actis Liberij Papæ cap. III. primo Conciliorum tomo, sic ait: Erat non longe à Coemeterio Nouellæ ad tertium milliarium ab Vrbe via Salaria Coemeterium Ostrianum, vbi Petrus Apostolus baptizauit.

II.

Coemeterium Vaticanum iuxta templum Apollinis, Caique, & Neronis, circum, via Triumphali situm: in hortis Neronianis, vbi nunc est basilica sancti Petri Apostoli, in quo iacere corpora sanctorum Romanorum Pontificum, Petri, Lini, Cleti, Anacleti, Euaristi, Xysti, Telesphori, Hygini, Pij, Eleutheri, Victoris, & aliorum, Damasus, Martinus, & cat. Hoc coemeterium fontis sancti Petri vocat liber censum, quod præter sepulchra, fontem quoque baptismi haberet, qui non omnibus coemeterijs communis erat.

III.

Coemeterium ad Nymphas, in prædio Seueræ via Nomentana, lapide abbe inter septimum & octauum, in quo sepulta fuerunt corpora sanctorum martyrum, Alexandri Papæ, Euentij & Theoduli, presbyterorum, Papæ, & Mauri militum, Apronianii tribuni, & aliorum, Damasus, & martyrologium.

IV.

Coemeterium vetus, quod postea à Papa Callisto ampliatum ex eius nomine Callisti appellatum est, via Appia, lapide ab Vrbe secundo, sub basilica sancti Sebastiani situm, in quo iacere corpora sanctorum martyrum, Romanorum Pontificum, Aniceti, Soteris, Pontiani, Anteri, Fabiani, Cornelij, Lucij, Stephani, Xysti II. Dionysij, Eutychiani, Caij, Eusebij, & Miltiadis: Item sanctorum Sebastiani, Cæcilie, Tertullini presbyteri, Nemesij diaconi, Lucillæ filie eius, & aliorum innumerabilium sacerdotum & martyrum. Damasus Papa: Hic fecit (inquit) aliud coemeterium via Appia, vbi multi sacerdotes & martyres requiescunt, quod appellatur vsque in hodiernum diem coemeterium Callisti. In eo coemeterio erant catumbæ, vbi aliquando iacuerunt corpora sanctorum Apostolorum Petri, & Pauli, & aliorum multorum sanctorum. De quibus ita scribit Damasus Papa: Sanctus Cornelius Papa rogatus à quadam matrona, Lucina nomine, corpora beatorum Petri & Pauli Apostolorum de catatumbis leuauit noctu, primum quidem corpus beati Pauli beata Lucina posuit in prædio suo, via Ostiensi ad latus, vbi decollatus est: Beati vero Petri corpus accepit beatus Cornelius episcopus, & posuit iuxta locum vbi crucifixus est, inter corpora sanctorum episcoporum in templo Apollinis, in monte Aureo in Vaticano Palatii Neroniani II. Kalend. Iulij. Bibliothecarius in vita Damasi Papæ: Hic dedicauit Platoniam in catatumbis, vbi corpora sanctorum Apostolorum Petri & Pauli iacuerunt, quam versibus ornavit. Bedas in libro de ratione temporum. Xystus III. Papa fecit Platoniam in Coemeterio Callisti via Appia, vbi nomina episcoporum & martyrum scripsit, ea commemorans. Gregorius Papa registri libro

III.

III. epistola XXX. ad Constantinam Augustam. De corporibus verò beatorum Apostolorum, quid ego dicturus sum? dum constet, quia & tempore quo passi sunt, ex Oriente fideles venerunt, qui eorum corpora, sicuti ciuium suorum peterent: Quæ ducta vsque ad secundum Urbis miliarium, vsque ad locum, qui dicitur ad Catatumbas, collocata sunt, sed dum ea exinde leuare omnis eorum multitudo conueniens niteretur, ita eos vis tonitruï, atque fulguris nimio impetu terruit atque disperfit, vt talia denuo nullatenus attentare præsumant.

Tunc autem exeuntes Romani, eorum corpora, qui hoc ex domini pietateauerunt, leuauerunt, & in locis, vbi nunc sunt condita posuerunt. Et paulò supra: Corpora sanctorum Petri & Pauli Apostolorum tantis in ecclesijs suis corruscant miraculis, atque terroribus, vt neque adorandum sinemagno illuc timore possit accedi. Extat adhuc hoc cœmeterium, sub basilica sancti Sebastiani via Appia. Leo magnus Papa fecit basilicam beato Cornelio Papæ, & martyri, iuxta cœmeterium Callixti, via Appia. Hæc Anastasius monachus, & sanctæ Romanæ ecclesiæ Bibliothecarius, Martyrologium, Liber censuum cameræ Apostolicæ bibliothecæ Palatinæ editus à Cencio camerario sanctæ Romanæ ecclesiæ, qui post Papa Honorius III. fuit, commemorant.

Cœmeterium sancti Soteris Papæ, & martyris quod cœmeterio Callixti vicinum, vel eius potius partem fuisse existimo. Id restaurauit Stephanus Papa II. Anastasius Bibliothecarius. Restaurauit tegumen cœmeterij sancti Soteris, quod ceciderat.

Cœmeterium sancti Zepherini Papæ & martyris, via Appia prope Catatumbas, & cœmeterium sancti Callixti Papæ, in quo ipse cum multis alijs martyribus sepultus est. Damafus.

Cœmeterium sancti Callepodij presbyteri sanctæ Romanæ ecclesiæ via Aurelia, lapide ab Vrbe II. aliàs III. extra portam Ianiculensem prope ecclesiam sancti Pancratij, vbi dormierunt sancti Papæ, Callixtus martyr, & Iulius confessor: sancti martyres, Palma vir consularis, cum vxore, filijs, & familia, numero XLII. Simplicius senator cum vxore, filijs, & familia numero XLIX. Iulius senator, Felix, & eius vxor Blanda. Damafus. Martyrologium, liber censuum.

Cœmeterium sancti Prætextati presbyteri, via Appia lapide primo ab euntibus per diuerticulum sinistrorsum, in quo dormierunt sancti martyres Urbanus Papa, Felicissimus, Agapetus, Ianuarius, & Magnus, diaconi: Vincentius, & Stephanus subdiaconi Xysti Papæ II. Quirinus Tribunus, & eius filia Balbina virgo, sub sancto Alexandro papa occisi. Damafus, Martyrologium, Liber censuum bibliothecæ Vaticanæ.

Cœmeterium sancti Pontiani Papæ, non longe à sanctis, Abdon, & Senen, in quo ipsorum martyrum corpora cum sancto Pigmenio presbytero, requieuerunt. Martyrologium, liber censuum.

Cœmeterium Cyriacæ, aliàs Crypta Tiburtina in agro Veranio, in qua condita sunt corpora sanctorum martyrum, Laurentij archidiaconi, Seueri presbyteri, Claudij subdiaconi, Romani Ostiarij, Crescentij lectoris, sub Xysto Papa II. Item Zosimi, Xysti III. & Hilari Romanorum pontificum, Hippolyti martyris, Concordiæ nutricis eius, cum alijs XIX. familiæ suæ, Iustini presbyteri, Cirenei, Habundij, Cyrillæ, Triphoniæ, martyrum. Extat adhuc in Ecclesia sancti Laurentij extra muros. Damafus, Bibliothecarius, Martyrologium, & Liber censuum.

Cœmeterium Lucinæ via Aurelia, extra portam sancti Pancratij. Martyrologium.

- XII. Cœmeterium Aproniani via Latina haud longè ab Vrbe in quo sepulta est sancta Eugenia virgo & martyr sub Gallieno Imperatore. Martyrologium.
- XIII. Cœmeterium sancti Felicis Papæ via Aurelia milliario ab Vrbe II. in quo iacet corpus eius, & Felicis II. antipapæ. Adiunctum est cœmeterio sancti Calepodij prope sanctum Pancratium, extra portam Ianiculensem. Damasus, Liber censuum.
- XIV. Cœmeterium Priscillæ, aliàs sancti Marcelli Papæ via Salaria veteri, in cubiculo claro, iuxta cryptam sancti Crescentionis, lapide ab Vrbe tertio, à sancto Marcello Papa dedicatum. De quo Damasus: Marcellus Papa rogauit quandam matronam nomine Priscillam, & fecit cœmeterium via Salaria, & XXV. titulos in Vrbe Roma. In hoc autem cœmeterio dormierunt sancti martyres, Marcellinus Papa, Claudius, Quirinus, & Antonius presbyteri: Marcellus ipse Papa & martyr, Siluester, Liberius, Siricius, & Cælestinus, Papæ & confessores: item Vigilus Papa, Pudens eum vxore Sabinilla, & filius Pudentiana, & Praxedæ, Basilla virgo, Hermes præfectus, Prothus, & Hiacinthus Eunchi. Damasus, Bibliothecarius, Martyrologium, Liber censuum bibliothecæ Vaticanæ, Restauratum à sancto Ioanne Papa, Bibliothecarius.
- XV. Cœmeterium sancti Timothei presbyteri via Ostiensi intra basilicam sancti Pauli Apostoli, in quo ipse iacet. Martyrologium.
- XVI. Cœmeterium Nouellæ via Salaria, de quo Protonotarius sanctæ Romanæ ecclesiæ in actis Liberij Papæ cap. II. Tomo conciliorum primo: Habebat (inquit) Liberius ab Vrbe Roma milliario tertio in cœmeterio Nouellæ via Salaria, quasi exul. Veniente autem die Paschæ vocauit vniuersos presbyteros, ciues Romanos, & diaconos, & sedit in eodem cœmeterio, & dixit: Nolite timere, quoniam vobiscum ego non habito in Vrbe Roma, sed habetis Vicarium, ecce fratrem meum, & presbyterum Damasum.
- XVII. Cœmeterium Balbinæ, aliàs sancti Marci Papæ, inter vias Appiam & Ardeatinam, iuxta basilicam sancti Marci Papæ, in quo ipse Pontifex dormiuit, Damasus in eius vita: Hic fecit basilicas duas, vnam in Ardeatina, in qua sepultus est, aliam in Vrbe Roma iuxta Palatinas. Ex huius suggestione Cōstantinus Augustus obtulit basilicæ, quam cœmeterium constituit via Ardeatina fundum rosarum, cum omni agro campestri præstante solidos XL. Et paulò infra: Marcus Papa moriens sepultus est in Cœmeterio Balbinæ, via Ardeatina, quod ipse insitens fecerat anno salutis CCCXXXVI. Gregorius III. Papa basilicæ beati Marci via Appia extra Vrbem sitæ, tectum dirutum de nouo refecit. Bibliothecarius. Pōtufex Nicolaus ad cœmeteriū beati Marci confessoris, atque Pontificis, quod inter Appiam Ardeatinamque vias positum esse cognoscitur, sancto deductus est spiritu, & hoc multis ruinis conuassatum reperiens, atque contritum, conatu summo releuans, mirificè construxit ac decorauit, diuinique cultus mysteriū, quod multos per temporum cursus discesserat, restituit ac restaurauit.
- XIII. Cœmeterium sancti Iulij Papæ via Flaminia, prope ecclesiam sancti Valentini, extra muros Vrbis, adhuc extat in vinea fratrum Eremitarum, ordinis sancti Augustini. De eo Damasus.
- XIX. Cœmeterium sancti Iulij Papæ via Aurelia, Damasus.
- XX. Cœmeterium sancti Iulij Papæ via Portuensi, Damasus.
- XXI. Cœmeterium sancti Damasi Papæ inter vias Ardeatinam, & Appiam, in quo iacent sancti martyres Processus, & Martinianus, ipse Damasus cum matre & sorore. Bibliothecarius: Hic fecit basilicas duas, vnam iuxta theatrum, quæ sancti Laurentij vocatur, aliam via Ardeatina, vbi requiescit in catatumbis. Damasus cœmeterium restauratum est à Ioanne VII. Papa, ut idem Bibliothecarius ait.
- XXII. Cœmeterium sancti Anastasij Papæ intra Vrbem regione quinta Esquilina, in Vico



Vico Vrsi pileati, prope ecclesiam S. Vibianæ, in quo iacet idem Anastasius, & Innocentius Papæ. Anastasius Bibliothecarius: Anastasius Papa sepultus est in cœmeterio suo ad Vrsum pileatum. Liber censuum bibliothecæ Vaticanæ. Antiqua inscriptio. Anno domini. . . . Mense Octobris . . . . dedicationem huius ecclesiæ sanctorum martyrum Simplicij, Faustini, & Beatricis ad cœmeterium Vrsi pileati, iuxta formâ Claudij ad portam Taurinâ. Quam primus Leo Papa maxima deuotione cum indulgentia & remissione trium annorum & X L. dierum fecit. In quo cœmeterio requiescunt quatuor millia CCLVII. corpora sanctorum, exceptis paruulis & mulieribus.

Cœmeterium sancti Hermetis martyris, aliàs sanctorum Hermetis, & Domitillæ martyrum, factum à Pelagio Papa II. Bibliothecarius, & liber censuum. XXIII.

Cœmeterium sancti Nicomedis presbyteri, & martyris, via Ardeatina, lapide ab Vrbe VII. extructum à Bonifacio V. Papa. Bibliothecarius: Hic perfecit cœmeterium sancti Nicomedis, & dedicauit illud. XXIV.

Cœmeterium sanctæ Hagnetis, via Nomentana, Liber censuum. Damasus in Liberio Papa: Rediens Romam Liberius Papa, habitauit in cœmeterio sanctæ Hagnetis apud germanam Constantij Augusti Constantiâ. Et paulò infra: Cōstantius Augustus reuocauit Liberium Papā de cœmeterio sanctæ Hagnetis. De hoc loqui puto Marcellinū lib. XXI. vbi ait: Iulianus Cæsar Helenæ coniugis defunctæ suprema miserat Romā in suburbio viæ Nometanæ condēda, vbi vxor quoque Galli quondā soror eius sepulta est Constantina. Damasus: Liberius Papa ornauit de platonēis marmoreis sanctæ Hagnetis sepulchrum. Bibliothecarius: Innocentius Papa constituit, ecclesiam beatæ Hagnetis martyris à presbyteris Leopardo & Paulino gubernari, & eorum sollicitudine regi, & ornari. Bonifacius Papa die Paschæ, sicut consuetudo erat, celebrauit baptismum in basilica sanctæ Hagnetis martyris, quam ruinæ proximam cum abside renouauit Symmachus Papa. XXV.

Cœmeterium sanctæ Felicitatis martyris via Salaria, in quo Bonifacius Papa sepultus est. Bedas, Bibliothecarius, liber censuum. Bonifacius Papa fecit oratorium in cœmeterio sanctæ Felicitatis, iuxta corpus eius, cuius & sancti Siluani sepulchra exornauit, vbi posuit hæc dona, patenam, Amam, Scyphum, calices duos, coronas tres, omnia argentea. Symmachus Papa basilicam sanctæ Felicitatis ruinæ proximam reparauit. Bibliothecarius. XXVI.

Cœmeterium Iordanorum à Symmacho Papa resectum, vbi quiescit corpus sancti Alexandri martyris. Bibliothecarius: Hic fecit cœmeterium Iordanorum in melius, propter corpus sancti Alexandri. XXVII

Cœmeterium sanctorum Nerei, & Archilei martyrum, via Ardeatina, in prædio sanctæ Dimitillæ, in Crypta Harenaria, lapide ab Vrbe secundo, restitutum à Papa Ioanne, in quo ipsorum corpora condita sunt. Martyrologium, & Bibliothecarius. Qui sic scribit: Hic Papa restaurauit cœmeterium beatorum martyrum, Nerei & Archilei, via Ardeatina, & Cœmeterium sanctorum martyrum, Felicis & Adaucti, & cœmeterium Priscilla. XXIIIX

Cœmeterium sanctorum Felicis, & Adaucti martyrum via Ostiensis, milliario ab Vrbe secundo. Renouatum à Ioanne Papa. Bibliothecarius. XXIX.

Cœmeterium sanctorum Tyburtij & Valeriani martyrum. Bibliothecarius in Ioanne III. Papa: Ioannes Papa retinuit se in cœmeterio sanctorum, Tyburtij, & Valeriani martyrum, & habitauit ibi multo tempore, vt etiam episcopos ibidem consecraret. Renouatū à Gregorio III. Papa. Idem Bibliothecarius. In quo iacuerunt sancti martyres Marcellinus presbyter, & Petrus exorcista. Martyrologium. Bibliothecarius: Hadrianus Papa tectum cœmeterij S. Tiburtij restituit. XXX.

Cœmeterium sanctorum Marcellini & Petri martyrum via Lauicana. Renouatum XXXI.

uatum ab Honorio Papa. Bibliothecarius in vita Hadriani Papæ: Cœmeterium sanctorum Marcellini, & Petri nouiter refecit, & gradus eius via Labicana, iuxta basilicam beatæ Helenæ renouauit. & eiusdem tectum refecit, quoniâ nullus iam descensus erat ad ipsa sancta corpora.

XXXII.

Cœmeterium sanctorum Marci, & Marcelliani martyrum, via Ardeatina, restauratum à Ioanne Papa VII. Bibliothecarius: Laborauit Ioannes VII. Papa in cœmeterijs sanctorum martyrum Marcelliani, & Marci, Damasq; sancti Pontificis.

XXXIII.

Cœmeterium sanctorum Ianuarij, Urbani, & Maximi martyrum restauratum, & ornatum à Gregorio Papa III. Bibliothecarius, Gregorius III. laborauit in cœmeterijs sanctorum martyrum Ianuarij, Urbani, Tyburtij, Valeriani, & Maximi, eorumq; tecta in ruinis posita à nouo refecit.

XXXIV.

Cœmeterium sanctæ Petronillæ ornatum à Gregorio Papa III. de quo Anastasius Bibliothecarius: In cœmeterio beatæ Petronillæ stationem annuè dare instituit, ubi obtulit coronam auream, calicem, & patenam argenteam, seu & alia diuersa ad orpatum ecclesiæ pertinentia.

V.

XXXV.

Cœmeterium sanctorum Simplicij, & Seruilianj

XXXVI.

Cœmeterium sanctorum Quarti, & Quinti.

XXXVII.

Cœmeterium sanctæ Agathæ ad Girolum via Aurelia, in quo  
ia cœuerunt corpora sanctorum Proculi & Martiniani.

XXXVIII.

Cœmeterium Vrsi ad Portesam.

XXXIX.

Cœmeterium Cardianum via Latina.

XL.

Cœmeterium inter duos Lauros ad sanctam Helenam.

XLI.

Cœmeterium ad Cluium cucumeris.

XLII.

Cœmeterium sancti Thrasonis ad S. Saturninū

XLIII.

Cœmeterium sancti Cyriaci via Ostiensis.

Astulfus Longobardorum Rex multorum sanctorum corpora effodiens, circa Romam eorum cœmeteria subuertit. Bibliothecarius in Stephano II.

Paulus Papa magnam sollicitudinis curam erga sanctorum cœmeteria indifferenter gerebat. Vnde cernens plurima eorundē sanctorum cœmeteriorū loca neglecta, ac desidia antiquitatis maxima demolitione, atq; iam vicina ruine posita, protinus eadem sanctorum corpora de istis dirutis abstulit cœmeterijs, q̄ cum hymnis, & canticis spiritualibus infra hanc ciuitatē Romanā introducēs eadē per diaconias, seu monasteria, & reliquas ecclesias, cū cōdecēti studuit honore recōdi, & p̄sertim in ecclesia monasterij, qd̄ in domo p̄pria in honorē sanctorum Pontificū Stephani martyris, & Siluestri cōfessoris à fundamētis erexit. Ad quam venerabilū sanctorum corpora, q̄ de p̄fatis demolitis abstulit cœmeterijs, maximo venerationis affectu transtulit atq; recondidit. Paschalis Papa multa corpora sanctorum, quæ in dirutis cœmeterijs iacebant, intra Urbē in ecclesia sanctæ Praxedis collocauit. In Porticu ante basilicam sancti Petri Apostoli, prope vetustissimum secretariū, quod nunc sancta Maria de febris vocatur, sepulta fuerunt corpora sanctorum Romanorū Pontificū, Leonis, Simplicij, Gelasij, Anastasij II, Sythimachi, Hormisdæ, Ioānis I. II. & III. Felicis III. Bonifacij II. Agapeti, Pelagiorū I. & II. & Gregorij I. Anastasij Bibliothecarij, & Ioānes diacon⁹ lib. III. de vita sancti Gregorij papæ:

In secretario, quod nunc dicitur sancta Maria de febre, ante basilicam sancti Petri Apostoli, quiescit Benedictus Papa.

In basilica sancti Petri apostoli dormiunt sancti Romani Pontifices, Sabinianus, Bonifacij III. IIII. V. VI. VIII. & IX. Deusdedit, Honorij I. & IIII. Severinus, Ioānes IIII. V. VI. VII. VIII. IX. XIV. XV. XVI. & XIX. Theodori I. & II. Eugenij I. & II. III. & IIII. Vitalianus, Adeodatus, Domni siue Domniones I. & II. Agatho, Leones I. II. IIII. VI. VII. VIII. & IX. Benedicti II. III. IIII. VI. VIII. & IX. Cuno, Sergij,

} Bibliothecarius in  
Hadriano Papa.

} Ex libro censuum cam  
meræ apostolicæ qui  
est in bibliotheca vau  
ricana collectis à Cœ  
cio Camerano S. R. E.  
qui postea creatus est  
Honorij III. Papa.

Sergij, I. II. Sifinnius, Constantinus, Gregorij II. III. IIII. V. & IX. Zacharias, Stephani II. III. IIII. V. VI. VII. VIII. & IX. Paulli I. II. & III. Hadriani I. II. III. & IIII. Paschalis, Valentinus, Nicolai I. II. III. & V. Marini I. & II. Formosus, Romanus, Christophorus, Anastasius III. Landones I. & II. Urbani I. & VI. Caelestinus IIII. Innocentij VII. & VIII. Callistus III. Pij I. II. III. & IIII. Xystus IIII. Alexander VI. Iulij II. & III. & Marcellus II. Laterani verò sepulti sunt Romani Pontifices Leo V. Sergij. III. & IIII. Siluester II. Ioanes X. XI. XII. & XIII. Agapitus II. Bonifacius VII. Alexandri II. & III. Paschalis II. Callistus II. Honorius II. Innocentij II. & V. Caelestini II. & III. Lucius II. Anastasius IIII. Clemens III. & Martinus V.

Ad sanctum Paulum requiescunt Felix II. & Ioannes XIII.

Ad sanctam Mariam Maiorem conditi sunt Benedictus X. Honorius III. prope praesepe & Nicolaus IV. Papae.

Ad sanctum Laurentium extra muros quiescit Damasus II. In Basilica verò sancti Clementis corpus eius octingentesimo post eius mortem anno à Nicolao Papa ex Graecia translatus, conditum est.

Ad sanctam Crucem in Hierusalem Benedictus VII.

Ad sanctam Sabbam in cella noua Ioannes XV.

Ad sanctam Vibianam Benedictus IX.

Ad sanctam Mariam nouam Gregorius XI.

Ad sanctam Mariam de Minerua Leo X. Clemens VII. & Paulus IV.

Ad sanctam Mariam de anima Hadrianus VI.

Extra Urbem verò Benedictus V. Antipapa Hamburgi in Saxonia,

Gregorius VI. & Gelasius II. Cluniaci in Gallijs.

Clemens II. Bambergae in Germania.

Victor II. Stephanus IX. & Ioannes quondam Papa XXIII. Florentiae

Gregorius VII. Salerni.

Victor III. Cassini.

Clemens III. Antipapa, Rauennae.

Lucius III. Veronae.

Urbanus III. Ferrariae.

Gregorius VIII. Pisis.

Innocentius III. Urbanus IV. & Benedictus XI. Perusiae.

Innocentius IV. Neapoli.

Alexander IV. Clemens IV. Hadrianus V. & Ioannes XXI. Viterbij.

Gregorius IX. Arretij.

Caelestinus V. apud sanctum Antonium de Ferentino.

Clemens V. Burdegala.

Ioanes XXII. Benedictus XII. Innocentius VI. & Clemens VII. antipapa,

Clemens VI. in monasterio Case Dei in Gallijs.

Urbanus V. Massiliae ad sanctum Victorem.

Benedictus XIII. Panischole.

Gregorius XII. Recaneti.

Alexander V. Bononiae.

sepul-  
ti sunt.

condi-  
ti sunt.

(Auiuione

#### DE COEMETERIIS EXTRA VRBEM. CAP. XIII.

**P**RAETER Romana coemeteria alia in omnibus ciuitatibus ubi Christiani essent, multa fuerunt, & praesertim extra Vrbes. Chrysostomus enim in sermone de fide & lege ait: Omnem ciuitatem, & omne castellum ante ingressum habere sepulchra. De coemeterio Alexandrino Athanasius in apologia de fuga sua. In hebdomada post sacram Pentecostem populus completis ieiunijs, ad oradum ad coemeterium abiit. De Antiocheno Euagrius libro primo cap. XVI. Sancti Ignatij

ossa robustiora, quæ relicta fuerant à bestiis, Antiochiam deportata, & in cœmeterio condita sunt. Thomæ Syri viri sancti corpus publico honore & pompa Antiochiam delatum, in cœmeterio conditum est, ut Euagrius lib. III. cap. LXXXV. ita commemorat: Thomas Syrus vir sanctus, cum reuenteretur in Hospitali ægro-tantium, quod in suburbio Daphne est, ad incorruptibilem vitam transiuit, cuius corpus in sepulturam exterorum a portarunt. Hic cum vnus & alter post ipsum sepulti essent, corpus ipsius supra illos inuentum, Deo sic illum maximo miraculo post mortem quoq; declarante. Etenim profundius eum sepeliendo abiecerant. Admirantes itaque Ephraïmo episcopo de hoc sancto significatum, ac sacrosanctum illius corpus, publico honore & pompa Antiochiam transferunt, in q; cœmeterio condunt, unde & pestifer morbus, qui tum inualerat, facta hac translatione quieuit. Annuum quoq; illius festum Antiocheni adhuc vsq; diem magnifice celebrant. Diuus Augustinus epistola LXIII. ad Aurelium Episcopum Carthaginensem, Ebrietates, & luxuriosa conuiuia, quæ in cœmeterijs tanquam martyrum honori, & mortuorum solatio habebantur, derestatur. De Cœmeterio Augustodunensi Gregorius Turonensis cap. LXXIII. lib. de gloria cōfessorum: Cœmeterium apud Augustodunensem urbem Gallica lingua vocitauit, eò quod ibi fuerint multorum hominum cāda uera funerata, inter quæ, quod sint quorundā fidelium dignarumq; de animarum sepulchra frequens occulte psallentium mysterium docet. Nam audiui, quod duo ex incolis loci, dum loca sancta orandi gratia circuire disponent, audiunt in basilica sancti Stephani, quæ huic coniuncta est cœmeterio, psallentium sonum. Fuerunt in singulis ciuitatibus duplicia cœmeteria, peregrinorum, & ciuium, quod exponit Euagrius lib. III. cap. XXXV. Cæterum de cœmeterijs in genere per omnes ciuitates multa supra diximus.

DE FESTIUITATIBVS, SACRIFICIIS, ET OBLATIONIBVS MEMORIE SANCTORUM. Cap. XIII.

A pud veteres patres in martyrum diebus festis oblationes, & sacrificia fieri solita fuisse indicat Origenes lib. III. in Iob: Antiqui diē natiuitatis celebrabant, vnam vitam diligentes, & aliam post hanc non sperantes. Nunc vero nos non natiuitatis diem celebramus, cum sit dolorum atque tentationum introitus sed mortis diem, utpote in omnium dolorum depositionem, atq; omnium tentationum effugationem, diem mortis celebramus, quia non moriuntur hi qui mori videntur. Propterea & memorias sanctorum facimus, & parentum nostrorum, vel amicorum in fide morientium deuote memoriā agimus, tam illorum refrigerio gaudentes, quā etiā nobis piā consumationem in fide postulantes. Sic itaq; non diē natiuitatis celebramus, sed mortis, quia in perpetuo viuunt ij, qui moriuntur. Celebramus nimirum religiosos cum sacerdotibus conuocantes fideles vnā cum clero inuitantes, adhuc egenos, & pauperes, pupillos, & viduas saturantes, ut fiat festiuitas nostra in memoriam requiei defunctis animabus, quarum memoriā celebramus, nobis autē efficiatur in odore suauitatis, in conspectu æterni Dei. Diuus Cyprianus presbyteris, & diaconibus suis: Cum voluntati, & cōfessionī nostræ in carcere, & vinculis accedit moriendi terminus, consumata martyris gloria est. Deniq; & dies eorum, quibus excedunt annotata, ut cōmemorationes eorum inter memorias martyrum celebrare possimus. Quamq; Tertullus fidelissimus, ac deuotissimus frater noster pro cætera sollicitudine, ac cura suā, quam fratribus in omni obsequio operationis impertit, q nec illic circa curā corporum deest, scripserit, ac scribat, & significet mihi dies, quibus in carcere beati fratres nostri ad immortalitatem gloriosæ mortis exitu transiunt, & celebratur hic à nobis oblationes, & sacrificia, ob cōmemorationes eorum, q cito vobiscum domino protégere celebrabimus. Et lib. III. epist. V. ad plebem & clerum de Celerino cōfessore, ordinato lectore: Sacrificia pro martyribus Laurétino, Ignatio, & Celerina, semper ut meministis offerimus, quoties martyrum passionēs, & dies anniuerfaria cō-



memoratione celebramus. Martyrum memoriæ præcipuè in ecclesia Romana celebrantur, super quorum sepulchra Missæ fiebant ex Felicis Papæ cõstitutionibus. De martyrum memorijs Diuus Augustinus lib. VIII. cap. XXVIII. de ciuitate Dei: Nec tamen nos eisdem martyribus tẽpla, sacerdotia, sacra, & sacrificia constitui-  
mus, quoniã non ipsi, sed Deus eorum nobis est Deus. Honoramus sanè memorias eorum tanq̃ sanctorum hominũ Dei, qui vsq; ad mortẽ suorũ corporum pro veritate certarũt, vt innotesceret vera religio falsis religionibus, fideisq; cõuictis, quod etiam si qui antea sentiebant, timendo reprimebant. Quis autem audiuit aliquando fidelium stantem sacerdotem ad altare, etiam super sanctum corpus martyris ad Dei honorem, cultumq; constructum dicere in precibus, Offero tibi sacrificium Petre, vel Paule, vel Cypriane? cum apud eorum memorias offeratur Deo, qui eos & homines, & martyres fecit, & sanctis suis angelis cælesti honore sociauit, vt eã celebritate, & Deo vero de illorum victorijs gratias agamus, & nos ad imitationem talium coronarum atq; palmarum, eodem inuocato in auxilium, ex eorum memoriæ rehouatione adhortemur. Quæcunq; igitur adhibentur religiosorum obsequia in martyrum locis, ornamenta sunt memoriarum, non sacra, vel sacrificia mortuorum, tanquam Deorum. Quicunq; etiam epulas suas eò deferunt, quod quidem à Christianis melioribus non fit, & in plerisq; terrarum nulla talis est consuetudo, tamen quicunq; id faciunt, quas cum appoluerint, orant, & auferrunt, vt vescantur, vel ex eis etiam indigentibus largiantur, sanctificari ibi eas volunt per merita martyrum in nomine domini martyrum: non aut ista esse sacrificia martyrum nouit, qui nouit vnum quod Deo illic offertur sacrificium Christianorum. Nos itaq; martyres nostros, nec diuinis honoribus, nec humanis criminibus colimus, sicut colunt illi Deos suos: nec sacrificia illis offerimus, nec Deorum probra in eorum sacra conuertimus. Adeundẽ plane modum loquitur lib. XXII. cap. X. Nos autem martyribus nostris non templa sicut Dijs, sed memorias, sicut hominibus mortuis, quorum apud Deum viuunt spiritus, fabricamus: nec ibi erigimus altaria, in quibus sacrificemus martyribus, sed vni Deo, & martyrum, & nostro sacrificium imolamus, ad quod sacrificium, sicut homines Dei, qui mundum in eius confessione vicerunt, suo loco & ordine nominantur, non tamen à sacerdote, qui sacrificat, inuocatur. Deo quippe, non ipsis sacrificat, quamuis in memoria sacrificet eorum, quia Dei sacerdos est, non illorũ. Ipsum verò sacrificiũ corpus est Christi, quod nõ offertur ipsis, quia hoc sunt & ipsi, &c. Refert diuus Ioãnes Chrysostomus in argumẽto epistolæ ad Romanos: Sancti Pauli Apostoli epistolæ lectas, quando ad martyrum memorias agendas Christiani conuenissent.

#### DE TRANSLATIONIBVS SANCTORVM MORTVORVM. Cap. XV.

**C**orpora sanctorum hominum humi, vel arcis inclusa ad alium locum transferri veteres consueuissẽ, exemplum est de corpore sancti Ignatii martyris, cuius ossa solidiora quæ Leonibus qui ipsum deuorauerunt, superfuerunt, vt scribit Nicephorus libro III. cap. XIX. longo tempore post, pij Christiani Roma Antiochiam detulerũt. Sanctus Cornelius Papa rogatus à quadam matrona Lucina, corpore beatorum Apostolorum Petri & Pauli è catatumbis leuauit noctu, & corpus quidem beati Pauli beata Lucina primum posuit in prædio suo via Ostiensi, ad latus vbi decollatus est: corpus verò beati Petri accepit beatus Cornelius episcopus, & posuit iuxta locum vbi crucifixus est inter corpora sanctorum episcoporũ in Vaticano. Modus translationis Romæ visitatæ, refert Sozomenus lib. VII. cap. X. Circa id tempus Meletij reliquiæ, & Constantinopoli Antiochiam sunt translatae,

& iuxta thecam Babylæ martyris sunt repositæ. Fertur autem, quod secundū Theodosij Imperatoris iussu, per totam viam publicam intra muros in ipsas ciuitates more Romano assumptæ, & per vices, & psalmodias singulis locis cum honore, donec Antiochiam deportarentur exceptæ fuerint. Ritū verò in leuandis, & transferendis martyrum inuentis corporibus in occidētalibus ecclesijs vsurpatum, sanctus Ambrosius indicat epistola XXIV. ad sororem, sic: Primum inuentæ seu studio, seu casu sancti alicuius reliquiæ populo monstrabantur, & cuius essent martyris significabatur. Deinde ordine componebantur, & transferebantur ad aliquod templum, vbi vigilæ tota nocte fiebant, concio de vita ipsius martyris habebatur, fiebat miracula. Aegri enim, qui vestes sanctorum, manu contigissent, sanabantur. Celebratur solennis illa translatio corporis sancti Babylæ martyris Antiochiæ, de qua Rufinus libro primo cap. XXX. Socrates lib. III. cap. XVIII. Quæ enim sacerdotes Apollinis Iuliano apostatæ Antiochiæ iuxta fontē Castalium nō litanti dixissent, sepulchrum Babylæ martyris, quod in vicinia erat, in causa esse, quoddā Apollo non daret responsa, mandauit, vt Galilæi (sic enim appellabat Christianos) venirent, & sepulchrum Babylæ auferrent. Igitur vniuersa ecclesia conueniens, virgines iuuenesq; immensa exultatione succincti, trahebant longo agmine arcam martyris, psallentes summis clamoribus, & cum exultatione dicentes: Confundantur omnes, qui adorāt sculptilia, & qui gloriantur in simulachris suis. Honorem reliquijs sanctorum à gentilibus, aut dispersis, aut quocunq; modo neglectis, & inuentis suum habuerunt, vt veterum exempla testantur. Narrat Sozomenus libro V. capite IX. mulierem quandam Gazensem collegisse reliquias ossium, martyrum eorum, quos Gazensis populus, propterea quod templa eorū idolatrica labefactassent interfecerant, Eusebij scilicet, Nestabi, & Zenonis fratrum, & in ollara reconditas, Zenoni consobрино eorum tradidisse, quas abditas, ille domi abseruauerit, oratorioque ædificato ea reposerit. In persecutione verò Perficæ sub Sapore Rege, & Magis Acepsimas episcopus fortiter in confessione perdurans mortuus est, cuius reliquias nonnulli ex Armenia exillis, qui Persis sunt vicini, clanculū sublatā sepelierunt. Narrat Sozomenus libro II. cap. XIII. De reliquijs Hilarionis monachi clām subreptis, & in Palestina reconditis, per Hefychium Hilarionis discipulum. mentionem facit idem Sozomenus libro III. cap. XIV. Memorantur pāsim sanctorum translationes in antiquis ecclesiæ catholicæ monumentis, quarum præcipuæ hæ sunt. S. Barnabæ Apostoli reliquiæ, cum euangelio B. Matthæi, ipsius Barnabæ manu Hebraicis characteribus scripto, ex Cypro Constantinopolim sub Zenone Imperatore translatae sunt. Theodorus libro II. collectancorum. Reliquiæ sancti Stephani ex Hierosolymis, sanctorum Laurentij, & Hagnetis ex Vrbe, Constantinopolim translatae, in martyrio sancti Laurentij ab Eudoxia Augusta Theodosij iunioris Imperatoris coniuge conditæ sunt. Theodorus libro II. & Bedas de temporum ratione. Corpus sancti Danielis prophetae Constantinopolim ex Iudæa translatum est, sub Imperatore Arcadio Augusto, & Attico Patriarcha Constantinopolitanis, Theodorus libro II. Sancti Ioannis Chrysostomi corpus, ex loco in quo obiit, Constantinopolim à Theodosio iuniore trāslatum est. Socrates lib. VII. cap. XL. Theodoretus lib. V. cap. XXXVII. Flauiani Episcopi Constantinopolitani corpus ex Epheso Constantinopolim translatum est à Theodosio iuniore Imperatore. Nicephorus libro XXXIV. cap. XLIX. Sub Zenone Imperatore Antiochiam delatae sunt reliquiæ Eustathij, ex Philippis Macedoniae, vbi ipse in exilio mortuus fuerat. Theodorus libro II. Sacratissimum corpus sancti Ioannis Baptistæ Hierosolymis à monachis inuētum, in urbem Phœnicie Emēssam translatum fuisse, scribit Bedas in libro de ratione temporū. Sāctorum Hermagoræ & Fortunati corpora ex Aquileia Gradū ab Helia Episcopo

Episcopo Aquileiensi translata sunt, Chronicon Aquileiense: Sancti Antonij monachi corpus inuentum, Alexandriam est deportatum. Isidorus, Beda, Honorius Augustudunensis, Addo III. etate Ioannes Papa III. corpora sanctorum Martyrum Anastasij, Mauri, Telij, Antiochiam, Asterij martyrum de Delmatia, & Istria Romam adduxit, & prope fontem Lateranensem in ipsorum nomini dedicata ecclesia sepeliuit. Leo II. Papa corpora sanctorum Simplicij, Faustini, Beatricis, & aliorum quorundam martyrum ad ecclesiam sancti Pauli transtulit. Sancti Anastasij Persæ reliquiæ Romam translatae sunt sub Papa Deusdedit, & in monasterio, ad aquas Saluas locatae. Theodorus Papa corpora sanctorum martyrum Primi, & Feliciani, ex harenario viæ Nomentanae, ad ecclesiam sancti Stephani in Cælio monte transtulit. Bibliothecarius. Anno Domini DCCXCIX. Monachus Hierosolymis veniens, à Patriarcha multas reliquias attulit Carolo Magno. Regino lib. II. Addo etate VI. Sancti Siluestri corpus Nonantulam anno DCCLII. tranflatum. Sigebertus. Sancti Nazarij reliquiæ ex Vrbe Roma in Gallia monasterium Laurensheim transportatum, anno DCCLXIII. Sigebertus. Valbertus Romam orationis gratia profectus, corpus sancti Alexandri secum Vilde hulem attulit, Henricus Herphordienfis cap. LXI. Chronicon Misnie. Sanctus Nabor Roma à Crodegando Metensi episcopo translatus est in cenobium Hilariacum. Auctor de vita eius cap. V. Sigebertus anno DCC LX IIII. Zacharias Papa transtulit caput sancti Georgij ex Patriarchio Lateranensi ad ecclesiā eius, in Velabro, cum hymnis & canticis. Bibliothecarius. Liutprandus, Longobardorum Rex corpus sancti Augustini doctoris, ex Sardinia Insula Ticinum transtulit, & in ecclesia sancti Petri in caelo aureo collocauit. Beda. Paulus Papa, corpus sanctæ Petronillæ beati Petri Apostoli filiæ ex coemeterio viæ Appiæ, ad basilicam sancti Petri transtulit, canentibus sacerdotibus, & populo celebritatem agente. Bibliothecarius. Legati Caroli Imperatoris ab Aarone Saracenorum Amyra redeuntes, corpora sancti Cypriani episcopi Carthaginiensis, & Sperati martyris Scillitanorum in Galliam deferunt anno DCCCII. Sigebertus. Corpora sanctorum Marcellini, & Petri ex Vrbe in Franciam translata sunt anno DCCCXV. Sigebertus. Rodulfus sancti Callisti Papæ corpus in Gallias detulit anno DCCCLIII. Sigebertus. Corpus sancti Marci à mercatoribus ex Alexandria Venetias deportatum, in maxima veneratione extructo templo fuit. Chronicon Venetiarum.

In translatione reliquiarum veteres Christiani vsi sunt iisdem penè ritibus, quibus in funeribus. Nam præcedentibus triduanis ieiunijs, preces, cantus, vigiliæ, mislarum solennia, oblationum dispensationes factæ sunt, vt ibi, quod ex veterum historijs intelligitur, in quibus sæpe multa miracula deus benedictus ipsorum sanctorum meritis operabatur.

De solenni ostensione reliquiarum narrat Henricus de Herphordia, Carolum Magnum publice significasse, vt omnes corde contrito cõfessi peccata sua Aquiligranum Idibus Iunij conuenirent, spectatum reliquias sanctorum de Hierosolyma & Constantinopoli allatas: Et synodum postea statuisse, vt quotannis feria III. ieiuniorum quattuor temporum in mense Iuniõ, reliquiæ illæ monstrarentur, capite LXIX.

#### DE PEREGRINATIONIBVS AD SEPVLCHRA SAN- ctorum. Cap. XVI.

**N**icephorus tradit homines ad sepulchrum sancti Clementis Papæ Chersonæ vicinum peregrinationis gratia conuenisse. Sic vero cap. XVIII. eiusdem libri scribit: Sanctus Clemens ancora ferrea collo eius appensa in altum

mare

mare proijcitur. Mari autem diebus septem ad tria millia passuum diuiso, multi eò eant, & martyris corpus exosculantur, templo diuina virtute excitato. Et quò aliquando mare, vt assolet, diuisum esset, populusq; stata ibi sacra peregisset, atq; inde rursus reuerteretur, euenit, vt per parentum obliuionē illic puer quidam relinqueretur, atq; vbi mare in sese redijt, puer tenellus etià tum vndis est obrutus. Deinde, quum rursus fluctus recessissent, parentes eò accessere, & puellum saluū & validum loculo sancti martyris assidentem, reperiunt. Quare cognita intellexerunt eum per inhabitantem ibi gratiam sortum, & citra nocumentum à feris marinis conseruatum esse. Quapropter sancto, quem decuit atq; oportuit, honore habito, cum puero suo domum sunt reuersi. Ceterum quum persecutionum tempore, non ita facilis fuerit persecutorū metu peregrinatio ad loca sancta, vel ad martyrum sepulchra, Constantino baptizato, vt res pia illico religiose coli est coepta. Cum enim Imperator Constantinus Christi fidem professus, loca terræ sanctæ ab Idolatrijs gentilium expurgasset & excoluisset propter Christi, & eius passionis memoriam, frequens ad ea loca pietatis causa peregrinatio ex toto terrarum orbe instituta est. Nam Constantinus Magnus in locum sepulchri Christi, idolo Veneris fœdatum, oratorium excitauit. Eius mater Helena mulier sanctissima illuc adorandi causa profecta, reperta Christi cruce duo templa ædificari curauit, vnū prope Dominicæ natiuitatis specum, alterum in monte ex quo Christus in cœlum ascendit. Eusebius lib. III. de vita Constantini. Rufinus lib. I. cap. VII. Postremo ipse Constantinus in loco Caluariz, vbi Christus crucifixus fuit, ingens templum extruxit, quod publica solennitate, patrum synodo accersita, dedicari iussit. Eusebius lib. III. de vita Constantini. Quæ res anniuersaria solennitate celebrata est, confluentibus eò ex omnibus mundi partibus Christianis, vt indicat Sozomenus lib. II. cap. XXVI. Atq; hac ratione solennis illius ad terram sanctam peregrinationis initium fuit. Sed etiam ad Urbem Romā ad Apostolorū corpora frequentissimas peregrinationes fuisse, intelligitur ex Augustino in epistola ad Madaurēses, Sophronio, Leone Papa, & Ioanne Chrysostomo, in demonstratione, quod Christus Deus sit aduersus gentiles. Nam qui ducebantur (inquit) qui contempti erant, & vincti, vbi defuncti sunt, regibus ipsis erant magis venerabiles, etiam Romæ, quæ Urbium est regalissima, relictis omnibus ad sepulchra piscatoris, & pelionis currunt & reges, & præfides, & milites, &c. Bertrada Romā venit adoratura ad limina Apostolorum anno DCCLXX. Vrspergensis in chronico, & Annales Fracorum. Golfrius abbas Bedæ & presbyter Romam orationis gratia profectus, in itinere obiit. Beda lib. II de ratione temporū. Grodegannius Romā ad martyrum sepulchra oraturū profectus est, cap. XI. de eius vita. Carolus Magnus intra annos XLVII. quater Romā ad vota persoluēda, & orandū profectus est. Eginardus. Vilitaldus Hierosolyma, & terrā sanctā vīstauit. Stedelius. Ex Francia multi nobiles Romā orandi gratia profecti sunt. Sub Leone Mauro. Addo. Multos amore diuino inflatos ex Anglia Romam abiisse, & religionis ergò tonsurā clericalem accepisse, refert Bedas de ratione temporum, & Addo sexta ætate. Haymo super epist. ad Romanos: Nunc ad tumulum Piscatoris flectunt genua Imperatores, & super euangelia. Eorum peregrinationem cōmemorat, qui ex Britānia voti causa Hierosolyma proficiscebantur. Solebant obfessos à dæmonibus ad loca sacra sanctorum martyrum ducere, & à Deo sanctorum precibus liberationē impetrare. Annonius lib. V. cap. XXX. de reb. gestis Francorum. Rabanus in admonitione ad populum, Rugiunt dæmones iuxta sepulchra, & iuxta reliquias sanctorū.

F I N I S opusculi de ritu sepeliendi, & de cœmeterijs.



ONVPHRII PANVINI  
VERONENSIS, FRATRIS

EREMITAE, AUSTINIANI,



INTERPRAETATIO MVLTARVM  
VOCVM ECCLESIASTICARVM, QVAE OBSCVRAE  
VEL BARBARAE VIDENTVR.



Item de Stationibus Urbis Romæ, libellus.



COLONIAE,  
APVD MATERNVM CHOLINVM!  
M. D. LXVIII

Cum gratia & Priuilegio Cæs. Maiestatis.